



Wantok

Namba 2135 Ogas 13 - 19, 2015 28 pes

Niuspepa Bilong Yumi Ol PNG Stret!

K1 tasol

**Kot i holim PNGSDP
mani - P2**

**Operesen long Ok Tedi
main i malolo long liklik
taim - P4**

**Kolta rot na pawa bai
kamap long Sauten
Hailans na Hela - P8**

Meri Nius

**Meri
Usino
mekim
naispela
rurel pisa
stail - P11**



Isipla wei long promotim bisnis bilong yu

GUTPELA KWALITI, GUTPELA PRAIS LONG PNG

Bisnis Kads **K120** | **K175**

200 kads + takis
Printin tasol
Wanpla sait, ful kala 300 gsm pepa.

200 kads + takis
wantaim disain wok

Only at... **THEODIST LTD**
THE STATIONERY SUPERMARKET
Waigani Drive, POM Maricham Road, LAE
Pho: 313 9800 / 7232 1300 Pho: 472 5488 / 7191 7854
sales@theodist.com.pg saleslae@theodist.com.pg

KOLIM MIPLA NAO!

O'Neill: Ikonomi i strong yet ...no ken tingting planti



Praim Minista
Peter O'Neill

Paul Zuvani i raitim

IKONOMI bilong Papua Niugini i strong yet.

OL pipel i no ken tingting planti long kain kain toktok i kamap, Praim Minista Peter O'Neill i tok.

Em i tok i gat inap mani long sapotim kantri i go long narapela 9-pela mun i go,

Long hevi bilong prais bilong ol bikpela komoditi (ol samting gavman i save salim long kisim mani) olsem wel, ges, gol na kopa i go daun ikonomi bilong kantri, i wok long go isi.

Em i mekim dispela tok long dispela wik bihain long ol sut tok olsem kantri bai bungim hevi bilong mani.

Tasol Mista O'Neill i tok maski long ol kain tok gavman i save em i gat inap mani long ranim kantri i go long narapela yia.

Na sapos em i mas daunim mak bilong mani plen bilong narapela yia i kam daun, em bai mekim na i gat tripela mun tasol i stap long em i mekim olsem.

Dispela yia mani plen i stap long

K16 bilien.

Em i tok nau ikonomi i gutpela moa long ikonomi bilong planti ol narapela kantri we ol i gat mani mak bilong kisim ol i go long narapela tripela mun tasol.

Em i tok ikonomi i gutpela long wanem long dispela taim inflesen o prais bilong ol guds na sevis i stap long wankain mak bilong 5 pesen.

Na mak bilong manmeri inap painim wok i stap long 5 pesen, winmani ol benk i givim long dinau i stap long 6 i go 7 pesen na mak bilong eksenis reit o senisim Kina i go long mani bilong ol arapela kantri, i stap yet tu long wankain mak.

"Dispela em i klia mak we i soim ikonomi bilong mipela i stap na ran strong.

"Ol pipel i no ken surik long ol kain toktok," O'Neill i tok.

Em i tok wok bilong gavman oltaim bai i no stret tasol maski long dispela gavman i wok hat long lukim ol disisen em i mekim i bilong gutpela sindaun bilong ol manmeri.

Em i tok ol lain i sutim tok long gav-

man i no ken sutim tok long apim nem bilong ol yet tasol i mas mekim wantaim gutpela tingting long helpim kantri.

"Mi askim ol manmeri long yumi mas bung wantaim na kamapim gutpela sindaun bilong yumi na pikinini bilong yumi long bihain taim," O'Neill i tok.

Tasol Oposisen Lida Don Polye i tok gavman i no tok tru long ikonomi.

Em i tok gavman i ranim krancki ikonomi na i wok long abrus long trupela tok.

"Maski em i kamapim Saplimentari Baset long nau, dispela bai i no inap helpim kantri.

Long wankain taim wanpela ripot bilong PNG Nesenel Risets Institute (NRI) we em i kamapim i no longtaim i go pinis i tok gavman i lukluk tasol long kisim mani long mineral na petroleum sekta i no gutpela.

Dairekta bilong Institut bilong Nesenel Afeas, Paul Barker i tok gavman i mas lusim kain rot na lukluk long ol arapela rot olsem egrikalsa long kisim mani. **I go moa long pes 2...**

"Friends"

"Kaibigan"

"Wantoks"

1975

Air Niugini
www.airniugini.com.pg

EXCLUSIVE CARRIER FOR THE 2015 PACIFIC GAMES

PORT MORESBY 2015 XV PACIFIC GAMES

TODAY

Kot i holim PNGSDP mani

Aja Potabe i raitim

PRAIM Minista Peter O'Neill i tok mani bilong pipel bilong Westen Provins i stap aninit long PNG Sas-tenebel Developmen Progrem (PNGSDP) i nau stap gut long wan-pela tras akaun long Singapo, tasol nau yet, gavman i hat long rausim na givim long ol pipel long Kiunga.

PM O'Neill i mekim dispela toktok las wik long Palamen taim Westen Gavana Ati Wobiro i askim sapos gavman i ken kisim dispela mani na mekim sampela samting long helpim ol pipel long Kiunga na Tabubil husat i kisim bikpela taim bihain long wara level bilong Flai Riva i go daun.

Las wik, Ok Tedi Maining Menesing dairekta, Peter Graham, i tok ol bai pasim dispela bikpela wol klas gol, kopa na silva maining bikos wara level bilong Flai Riva em i go daun na i hat long larim ol bikpela sip bilong karim kago i kam insait long Kiunga.

Gavana Wobiro i tingting long kamapim wanpela rot i go long ples Aembak long joinim Kiunga na larim ol bikpela sip i sua long dispela ples, we em i stap arere long as bilong Flai Riva.

Long Aembak, ol kar bai kisim kago i go kam long Kiunga na Tabubil. Moa

long tri kota rot joinim Kiunga na Aembak i kamap pinis tasol liklik hap tasol i stap yet, Wobiro i tok.

Wobiro i bin tingting long joinim Kiunga-Aembak rot na tu em i bin lukim dispela i ken sevim pipel na gavman wantaim. Olsem na em i bin askim O'Neill sapos gavman i ken kisim sampela mani i stap long tras akaun bilong PNGSDP long mekim dispela wok long sevim pipel bilong Not Flai.

Tasol O'Neill i tok hai kot bilong Singapo i holim olgeta mani bilong PNGSDP. Bipo olgeta mani bilong PNGSDP i save stap long wanpela tras akaun bilong Mineral Risos Atoreti (MRA).

"Samting i stap long kot yet. Na kot i holim olgeta samting bilong PNGSDP bikos bikpela kot namel long PNGSDP bot siaman Sir Mekere Morauta na PNG Gavman i no pinis yet," O'Neill i tok.

"BHP i les long stretim toktok wantaim PNG Gavman.

"Ol loya bilong gavman i tokim Atoni Jeneral olsem PNG Gavman i ken winim dispela kot. Tasol long rausim mani long tras akaun na sevim pipel bilong Westen em i hat bikos samting i stap pinis long han bilong kot," O'Neill i tok.

NRI i gat nupela iekonomik yunit



Dairekta bilong NRI, Dokta Charles Yala wantaim Dokta Osborne Ogis Sanida long wanpela midia konprens long NRI.

Esther Bralyn Wani i raitim

NESENEL Risets Institut (NRI) i gat nupela iekonomik yunit bilong em nau long Pot Mosbi we Dairekta bilong ol, Dokta Charles Yala i tok aut long las wik Fonde.

Ol i kamapim indipenden na objektif glas tok-tok long mak we ikonomi o wok mani i stap long en na dispela em long tupela taim insait long wanpela yia. Em long Julai na Disemba.

Dispela em bilong lukim olsem ol strongpela na trupela ol glas wok bai kamap na i no wankain olsem ol opisel wok.

"Namba wan ripot i pinis, na bai kam aut long dispela mun. Ba mipela tok save long midia wanem taim bai mipela opim ripot," Dokta Yala i tok.

Long wankain taim, Sina Risets Felon a Program Lida Dokta Osborne Ogis Sanida i go pas long Ikonomik Polisi na Risets Program.

Rausim Katolik Sapel klostu long Laloki ...Bikos long nupela bisnis developmen wok

OL KATOLIK komyuniti long Laloki eria i wari nau bikos ol i no gat ples bilong lotu na holim ol yut, mama, helt na sosel ek-tiviti bilong ol.

Dispela i kamap bihain long ol i rausim liklik haus lotu bilong ol i bin sanap long Disogo moa long 40 krismas nau. Dispela haus lotu i sana arere long Hiritano Haiwe, klostu long Laloki Saikiatrik Haus sik.

Ol ripot Wantok Niuspepa i kisim long asde i tok wanpela bisnis man i laik kamapim ol wok long dispela hap graun na long dispela wik Tunde, ol buldosa i go na rausim liklik sios biling wantaim olgeta samting i stap insait bilong redim na wokim lotu long en.

Ol ripot i tok komyuniti long dispela eria i wari na sori i stap

long lukim dispela samting i kamap na ol i laikim Katolik Sios, ol papagraun na bisnis man i stap insait long dispela samting long stretim tok.

Asbisop bilong Pot Mosbi Katolik Asdaiosis, John Ribat, i bin go antap long Laloki long bung wantaim ol komyuniti na papagraun lida, sios na bisnis man i laik wokim bisnis long dispela hap graun.

Ol ripot i tok ol papagraun i bin givim dispela hap graun long Katolik Sios long sanapim haus lotu na karimaut ol sios, yut na komyuniti program moa long 40 krismas i go pinis.

Ripot i tok taim sios i stap long hap, em i daunim ol kriminel na raskol pasin bikos i save gat ol yut na sosel program, wantaim tu ol program bilong ol mama

we ol Sister i save ranim long hap.

Ripot i tok Nesanel Kapitel Distrik Helt lain i save yusim dispela hap bilong Katolik Sios long karimaut ol banis sut program na tu, ol awenes program long komyuniti long Laloki.

Wantok bai ranim moa stori long neks wik bihain em i kisim ol toktok i bin kamap long wanpela bung asde namel long Katolik Sios hetman bilong Pot Mosbi Asdaiosis, ol papagraun, komyuniti na bisnis man we ol lain bilong em i go rausim sios biling long Disogo.

Ripot i tok samting olsem 100 Katolik manmeri na pikinini i save go lotu long dispela sios olgeta Sande.

Em i tok taim komyuniti i gro, populesen i save go lotu long dispela sios i gro tu.

PM: Ikonomi strong yet

I kam long pes 1...

Em i tok hevi nau gavman i bungimi bihain pundaun bilong ol prais bilong ges, wel, gol na kopa i soim klia olsem dispela ol samting oltaim bai no inap strongim ikonomi.

Em i tok planti manmeri i save stap long strong bilong egrikalsa na gavman i mas lukluk long dispela.

Taim gavman i no sapotim egrikalsa em i sapotim ol liklik manmeri na ikonomi wantaim.

Barker i tok sapos gavman i laikim gutpela na strongpela ikonomi em i mas lukluk long tupela sait wantaim, wel na gol na agrikalsa.

Em i tok mani bilong egrikalsa em i ken yusim nau na mani bilong wel na ges em i ken putim long SWF.

Em i tok long wankain taim tokaut

bilong Ok Tedi long pasim wok i no gutpela long taim gavman i wok long bungim hevi bilong mani.

Na olsem gavman na Sentral Benk na ol arapela poroman bilong em i mas was gut long kamap bilong kain ol hevi.

Em i askim gavman long rivium hariap 2015 Mani Plen bilong em.

Barker i tok bikos long kain hevi gavman i mas lukluk tasol long ol bikpela hap olsem helt, eduksen, rot na bris na lo na oda.

Tasol Praim Minista Peter O'Neill i tok gavman i save long kain hevi na olsem em bai mekim senis long mani plen taim em i skelim em i mas mekim.

Talk more for just K1 a day

Subscribe to our K7 weekly pass. Dial *123*7#.

Contact us now!

Customer Care 76003555
support@bmobile.com.pg

www.bmobile.com.pg

Get 7 days **UNLIMITED FREE CALLING** Between Bmobile-Vodafone numbers

20 MB Internet data

10 MIN Calls to any network in PNG

20 SMS Text to any network in PNG



Klaimet senis em asua bilong bikpela kantri

Aja Potabe i raitim

i NO PNG na ol Pasifik Ailan kantri i kamapim ol grinhaus ges bilong kamapim klaimet senis, tasol ol bikpela kantri olsem Australia, Inglan, Japan, Saina, Rasia na Amerika i save kamapim ol grinhaus ges.

Envairomen na Konsevesen Minista, John Pundari i tok asua bilong ol dispela biknem kantri long sakim tok bilong ol saveman na larim ol bikpela fektori na indastri bilong ol long kamautim bikpela smuk nogut o grinhaus ges i nau wok long kamapim bikpela birua long PNG na ol narapela liklik Pasifik Ailan kantri.

Pundari i bin mekim dispela toktok long Palamen taim memba bilong Dei, Wesley Nukunji askim sapos PNG em i save rausim grinhaus ges i go aut long atmosfera.

"No gat. PNG i no save rausim ol ges no gut o grinhaus ges bilong kamapim globel waming o ples i go tuhat moa na klaimet senis. Tasol asua bilong ol arapela biknem kantri long sakim tok na larim ol bikpela fektori bilong ol i rausim ol ges nogut i kam aut long atmosfera i wok long bagarapim ol liklik ailan kantri olsem yumi PNG na ol arapela poroman kantri bilong yumi insait long Pasifik," Pundari i tok.

Pundari i tok long PNG, ol manmeri long Kataret Ailan long Buka i wok long lusim ples bikos solwara i wok long kam antap na klostu laik karamapim dispela liklik ailan.

Wankain olsem tasol, Pundari i tok ol manmeri bilong Pasifik Ailan tu i wok long kisim was na redi tasol long lusim ples bikos solwara i wok long isi isi i kam antap na klostu bai karamapim ol ples, bus, graun, haus na olgeta samting.

"Ol dispela kantri i laik sakim tok na mekim samting long laik bilong ol yet. Tasol ol i gat moa mani na pawa long wol. Olsem na ol i mekim dispela kain pasin. Kantri bilong yumi i liklik na yumi no gat mani olsem na ol asua bilong ol bai mekim mipela i kisim taim," Pundari i tok.

Tomuriesa i tokim PNGFI long wok kostu wantaim gavman

MINISTA bilong Fores, /Douglas Tomuriesa, i tok Papua Niugini Fores Indastri (PNGFI) i mas wok gut wantaim gavman long kirapim kantri.

"Olsem Minista bilong Fores, mi wari long ol man husat i katim diwai i no givim risit bilong ol diwai ol i salim i go long ol narapela kantri, long Benk bilong PNG na Intanel Revenu Komisen (IRC)," Minista Tomuriesa i tok.

"PNG Fores Autoriti na PNG Kastom Sevis i lukluk gut long ol diwai mipela i save salim i go aut. Gavman i givim kontrak i go long SGS long makim ol wan wan man i ken sanap long hap bilong katim diwai long lukautim gut."

"I no gat wanpela rot i stap long ol opereta bilong diwai i ken giaman na givim rong namba bilong diwai mipela i salim. Bikos mipela i gat olgeta rekot bi-


long wan wan diwai olsem Ekspot Permit, Bill ov Lod-ing na Kastom Kliarens Setifiket bai soim rot long painimaut ol paul pasin bai kamap," Mista Tomuriesa i tok.

Minista Tomuriesa i tok moa olsem em i laikim PNG Fores Indastri Asosiesen (FIA) i mas tokim ol memba bilong em long wok bung wantaim gavman.

"FIA i ken mekim lista bilong olgeta opereta bilong diwai long PNG husat i no kamap memba bilong FIA long ol i ken kamap memba kwik taim," Minista i tok.

"Mi bai mekim wok painim aut long ol paol pasin bai kamap insait long wok bilong katim diwai."

"Ol diwai opereta husat i no bihainim ol rul bai tok-tok gut wantaim lo bilong graun na man i gat pawa."



Klaimet i senis na solwara i solap na karamapim planti ples long Manus Ailan na Cataret Ailan.

Kaimet senis katun bilong Jada Wilson

A SMART SOLUTION FOR SMALL BUSINESS

Mobile & Internet Banking

Make supplier payments, transfer funds, pay workers and manage accounts anytime, anywhere.

EFTPoS

Safer, convenient solution for you and your customers. Reduces risk of cash handling and builds financial history.

Smart Business Debit Card

Make payments for goods and services and withdraw cash via the ATM and EFTPoS with your Smart Business Debit Card.

PLUS - Smart Business Loan

By having a Smart Business Package Account, you can have access to a Smart Business Loan.

BSP Smart Business Package

offers essential products that can help SMEs manage business funds and provides a pathway for growth.

NOW OPEN

BSP SME Business Centre
Waterfront Place Shopping Mall,
Port Moresby.



320 1212 / 7030 1212 - 24/7
servicebsp@bsp.com.pg
www.bsp.com.pg



Polye wari long pipel

OPOSISEN Lida Don Polye i wari tru long ol liklik pipel bilong dispela kantri bikos prais bilong ol samting bilong baim long stua bai go antap.



OPOSISEN Lida Don Polye

kisim bikpela dinau mani na dispela mani bilong LNG bai no inap senisim dispela kantri,"Polye i tok.

Em i tok tu olsem gavman i no gat mani nau long givim sevis long pipel.

"Em bai hat long gavman long bihainim 2015 nesanel baset na givim sevis long pipel. Oposisen i laikim gavman long mekim gen wanpela saplimentari baset long sevim dispela kantri,"Polye i tok.

Fainens Minista James Marape i bin tokaut tu olsem LNG mani bai no inap long stretim olgeta samting.

"20 pesen bilong nesanel baset tasol i kam long LNG mani na dispela bai no inap long helpim long senisim o kirapim dispela kantri,"Marape i bin tokim PNG Up-Date semina.

Praim Minista Pita O'Neill i tok ikonomi bilong dispela kantri

i stap gut long han bilong gavman.

"Kantri i ran gut. Pipel I no ken wari. Gavman i givim sevis long pipel. Dispela gavman i mekim planti gutpela samting we ol bipo gavman i no bin mekim,"O'Neill i tok.

O'Neill i tok bihain long 5-vpela yia, kantri bai lukim planti gutpela samting O'Neill-Dion gavman i wok long mekim.

Tasol long sait bilong ikonomi, PM i tok kantri i ran gut na pipel i no ken suruk o guria long toktok bilong Oposisen.

Marape tu i tok gavman i yusim mani gut na i no gat wanpela asua i stap long manmeri long pret.

Riviu bilong dispela wik...

OTML bai op long 2016 – Tabubil

MENESMEN bilong Ok Tedi Mining Limited (OTML) i tokaut olsem ol i salim planti ol wokman na meri i go long ples bilong ol.

Wanpela pas i go aut pinis long ol kontrakta, ol bisnis na ol kampani i save givim sevis long Tabubil olsem OTML i salim ol woklain wantaim ol famili bilong ol go bek long ples bikos kaikai go was yusim pawa bai sot.

Ol polis bai luksave olsem ol samting bilong kampani i stap gut. Bai ol woklain i kisim pe bilong ol long taim ol i stap long ples na ol i ken go bek long wok taim menesmen i tok save.

Minista saspem inap 3-pela mun

WANPELA Lidasip Traibunel i saspem dim Minista bilong Rilijen, Yut na Komyuniti Divelopmen, na memba bilong Sohe long Oro provins, Delilah Gore long 3-pela mun.

Dispela i kamap bihain long em i yusim nem bilong pablik opis taim em i stap olsem pasindia long PX 853 long Girua ples balus na em i krosim wanpela wok meri bilong balus. Dispela meri i bin askim Minista long pasim mobail bilong em.

Minista Gore bai no inap kisim potnait pe inap 3-pela mun long wanem kot i lukim olsem em i asua long mekim dispela pasin.

Polis painim ol saspek-Madang

OL Madang polis i painim 4-pela saspek husat i bin reipim wanpela saintis bilong Amerika long Karkar ailan long 2013.

Dispela 4-pela man i ranawe long Nesanel Kot Haus long Madang, taim ol CIS opisa i holim ol stap long las wik Trinde.

Ol polis i putim notis long kalabus long painim 4-pela man long Madang husat i bin gat sas long bung reip, yusim gan na stil na haitim ol tripela saintis bilong Amerika long Epril 19, 2013.

Haus sik i op gen - Wewak

WEWAK Jenerel Haus sik long Is Sepik bai i op gen bihain long wanpela wokman bilong haus sik i bin dai las wik.

Wanpela opereta bilong swisbot i wetim kar long kisim em long 12 klok nait na ol man i paitim em.

Haus sik bai op gen long wanem Sif Eksektiv Opisa (CEO) bilong haus sik, Mark Mauludu i tok olgeta pipel i no inap karim hevi bilong ol liklik man tasol husat i mekim dispela rong pasin.

Ol pipel long Simbu i sot long wara- Simbu

Ol pipel long Simbu provins i kisim taim long wara long wanem no gat ren long tripela mun na ples i drai.

Ol i stat long baim wara na ol pipel i slip sait long ol bikpela wara i wok long ranim ol pipel husat i go long dring wara o wasim klos.

Ol skul tu i op long hap de tasol na salim ol lowa gret i go bek long haus na ol apa gret i stap inap 3 klok long apinun.

Long wankain taim, haus sik i helpim ol sik pipel long imejensi tasol.

Sepik LLG bai-ileksen i ran gut

DEPUTI Praim Minista na Minista bilong Inta-Gavman Rilesens, Leo Dion, i amamas long ol lokal na provinsal autoriti long Is na Wes Sepik Provins long karim aut bai-ileksen bilong Lokal Level Gavman kaunsil na i kam long pinis bilong en.

Mista Dion i tok tenyu long tupela Provinsal Gavman na Provinsal Edministresen long redim mani, opisa na gutpela sapot long pinisim LLG bai-ileksen.

Em i tok tenyu tu long ol sapot we ol opisa bilong Dipatmen bilong Provinsal na Lokal Gavman Afeas, Polis na Ilekteral Komison i givim.

"Dispela em i gutpela sain na mi strongim ol narapela provinsal gavman na edmin-

Dion i tok tenk yu...

istresen i gat ol emti LLG na wod long redim mani, wokman na ol narapela sapot long helpim Papua Niugini Ilekteral Komisen long karim aut bai-ileksen," Minista Dion i tok.

Minista Dion i tok Ken Mathew em i nupela LLG memba bilong Sepik Timbers-03 Kaunsil Wod insait long Wewak Eben LLG long Is Sepik provins.

Long Wes Sepik provins, i gat 6-pela LLG i go long bai-ileksen olsem Walas Rurel, Wes Aitape Rurel, Oksapimim Rurel, Bewani-Watung Rural, Vanimo Uben na Wes

Wapei Rurel.

Lista bilong ol wina bilong LLG memba i stap olsem; John Noss i win long Walsala Rurel Kaunsil Wod long Walsala LLG.

Benjamin Pena i win long Paupa-04 Kaunsil Wod long Wes Aitape Rural LLG na Gawi Tes long Kusanap-05 Kaunsil Wod long Oksapimim Rurel LLG.

Gabriel Bei i win long Bewani-Wutung Rural LLG aninit long Amoi-19 Kaunsil Wod.

Tupela meri tu i win long LLG na em long Dorothy Nawoto, husat i win aninit long Waraston-06 Kaunsil Wod long Vanimo Eben LLG, na Nancy Leima long Wes Wapei Rural aninit long Mokai-07 Kaunsil Wod.

Operesen long Ok Tedi main i malolo long liklik taim

SANAP antap long as tingting bilong drai sisen, operesen bilong OK Tedi Maining Limited (OTML) bai malolo liklik.

Long ol mun i go pinis, ren i no kam na bikpela wara i go daun olgeta na i abrusim mak bilong sip i save ran na saplai bilong pawa i go daun tu.

OTML i wok yet long kisim fiul i go insait long maining hap long karim ol samting bilong wok i kam aut taim level bilong

wara i orait na pawa i ran long gutpela level. Plen bilong rausim presa long ol bikpela saplai em ol i wok gut. Long sait bilong ol famili bilong ol wok lain, OTML bai salim ol i go long ol narapela hap pastaim, taim main i stap pas na hevi long wara level bilong Ok Tedi riva i stap yet.

Ol i redim kaikai, fiul na mani bilong baim balus long ol famili taim ol i lukim olsem ol bai kisim malolo long operesen.

OTML bai givim mani long ol wokman insait long wik na mun ol bai no inap long wok bikos dispela bai helpim OTML long statim gut wok bilong em gen wankain olsem em i save mekim bipo.

Ol gavman skul long Tabubil i operet yet long ol as ples sumatin i ken skul na larim ol gret 10 na 12 i ken sindaun long bikpela tes bilong ol.

OTML i helpim ol sumatin bi-

long OTML famili long painim ples long ol narapela hap.

Westen Provins Edministresen na ol komyuniti lida i toktok yet long ol sampela bagarap bai bungim ol long dispela taim bilong drai sisen na operesen bilong OTML i pas.

Ol bikpela sevis olsem haus sik, bikpela stoa na ol benk bai operet yet tasol em bai kam daun liklik long mak we ol i save operet nau long en.

Powi: Tok bilong God bai senisim kantri

Aja Potabe i raitim

TOK bilong God tasol i bin bungim kankain tokples na pasin tumbuna bilong dispela kantri na kamapim PNG olsem wanpela gutpela kantri.

Sauten Hailans Gavana William Powi i tok maski PNG i gat moa long 800 kankain tokples, aninit long mari mari bilong God na insait long lotu pasin tasol yumi ol pipel i bung wantaim na sanap wantaim olsem wan pipel na wan kantri.

Powi i tok bipo sampela tumbuna bilong yumi PNG i save kilim na kaikai man. Sampela i save pait wantaim supia na bunara na kilim wanpela nara-

pela i go i kam.

Maski waitmen husat i wokman bilong gavman i bin kam pas long PNG, ol i no bin kisim pasin bel isi na gutpela sindaun long senisim dispela kantri.

Powi i bin mekim dispela toktok long Palamen taim em i laik tokim ol memba olsem wanpela longtaim Buk Baibel ol i bin kisim kam insait long kantri bai nau stap long Palamen Haus olsem Nesanel Tresa.

Pasin bel isi na gutpela pasin poroman i bin kam insait long dispela kantri taim ol miseneri i bin karim Tok bilong God i kam insait long kantri.

"Olsem tasol, dispela King James Vesen buk Baibel mipela

i kisim kam insait long kantri bai stap hia long Palamen. Em bai kamap olsem Nesanel Tresa bilong PNG,"Powi i tok.

Em i tok Tok bilong God i bin senisim tupela biknem kantri – Inglan na Amerika. Wankain olsem tasol, Tok bilong God i bin senisim PNG long taim, na nau taim kantri i laik kamap 40 yia ol, dispela olupela Buk Baibel i painim we bilong en i kam olgeta long PNG we em bai stap i go wetim kambek bilong Jisas Kraus.

"Dispela 404 yia ol Buk Baibel bai stap long PNG na wetim Jisas Kraus long kambek. Dispela i soim PNG i nogat arapela God tasol God bilong Abram,

Aisak na Jakob em i God bilong yumi,"Powi i tok.

Gavana Powi, Palamen Spika Theo Zurenuoc, Memba bilong Usino-Bundi Anthon Yagama na Kundiawa Gembog memba Tobias Kulang, memba bilong Mendi De Kewanu wantaim sampela biknem pasto bilong wanwan sios i bin go kisim dispela olupela Buk Baibel long Indianapolis stet long Amerika long mun Epril 2015.

Praim Minista Peter O'Neill, Oposisen Lida Don Polye, Fainens Minista James Marape na ol arapela sinia gavman minista i bin sapotim na soim bikpela amamas long Powi na tim bilong en husat i bin kisim i kam insait long kantri dispela Buk Baibel.



PIH Saveman *Nius*

"I kam long Pacific International Hospital Port Moresby"

Ph: 311 3000 and 799 88000 Textline 7155 8866 Website: www.pih.com.pg

Special Care for newborns at risk

IN our previous articles we talked about what expectant mothers can do to stay healthy, now let's find out about the risks to the baby during the period of delivery and immediately after.

Our pikinini may have problems when they are born. But the good news is, there is now in Papua New Guinea, right at our very own Pacific International Hospital, a Neonatal Intensive Care Unit, or NICU. The NICU is a room specially designed and fitted-out with equipment that will address the problems affecting the newborn child.

Baby Factors or babies needing the NICU.

A NICU would be very significant for babies who are:

- Premature (born before 37 weeks of pregnancy)
- Low birth weight, meaning less than 2,500 grams or lower than 5 pounds 8 ounces (5.5 pounds)
- Heavy birth weight of over 4,000 grams (4 kilos), or higher than 8 pounds 13 ounces
- Small size for gestational age
- Twins, Triplets & other multiples
- Babies with medical conditions like heart problems, infections & birth defects
- Respiratory distress like rapid breathing, grunting, and apnoea (breathing stops)
- Infections such as herpes, group B streptococcus, chlamydia
- Seizures
- Hypoglycaemia (low blood sugar)
- Need for extra oxygen or monitoring
- Need of intravenous (IV) therapy, or medications
- Need for special treatment such a blood transfusion



Sr. Bindu attending to a baby in the NICU of Pacific International Hospital sometime in mid-June 2015.

Maternal Factors

Factors connected to characteristics of the mother could be high-risk factors that makes a baby a potential candidate for NICU, such as:

- Age of mother is younger than 16 years of age, or above 40 years
- Drug or alcohol consumption during pregnancy
- Diabetes
- Hypertension (high blood pressure)
- Bleeding
- Sexually Transmitted Diseases (STDs)
- Multiple pregnancy (twins, triplets or more)
- Too little or too much amniotic fluid
- Premature rupture of the membranes (also called the amniotic sac or bag of waters)

Delivery Factors

During the childbirth, some factors could emerge, such as:

- Foetal distress / birth asphyxia (changes in the organ system due to lack of oxygen)
- Breech delivery presentation (buttocks delivered first) or other abnormal presentation
- Meconium (the baby's first stool passed during pregnancy and into the amniotic fluid)
- Nuchal cord (the umbilical cord is around the baby's neck)
- Forceps or caesarean delivery

Specialist personnel

In a NICU, there are specialist professionals like a Neo-natalist, a paediatrician with additional training in the care of sick and premature babies

Specialized NICU equipment

The specialized equipment in a

NICU include:

- Phototherapy/Bili lights – bright blue fluorescent lights placed over a baby's incubator treats jaundice (yellowing of the skin and eyes)
- Blood pressure monitor – machine that takes your baby's blood pressure at regular times, reading coming from a small cuff wrapped around baby's arm or leg
- Cardiopulmonary Monitor – connected to pads on baby's chest, this machine tracks your baby's heart and breathing rates
- Central line – an intravenous line inserted into a vein in the arm that delivers medicines or nutritional solutions. It is either the PICCV type or the C-PAP type which is through tubes placed at baby's nose
- Oxygen Hood - fit's over baby's head to supply baby with oxygen, for cases where the baby can breathe on their own but needs extra oxygen
- Pulse Oximeter – reduces the need for painful blood tests by

using a light sensor coming from a small U-shaped device wrapped around baby's foot or hand, to check if the baby has enough oxygen in her blood

- Radiant warmer – Open bed (not an incubator) with an overhead heating source to keep baby warm
- Ventilator (or respirator) – baby's lungs receive warmed and humidified air through this mechanical breathing machine

All this at the NICU in the very new and modern Rose Wing of the Pacific International Hospital on 3-Mile Hill Port Moresby to manage delicate pregnancy and childbirth situations.

The Pacific International Hospital is fortunate to have eminent medical practitioners in this field, such as Obstetrician-Gynecologists Dr. Mathias Sapuri and Dr. Onne Rageau, as well as paediatrician Dr. Mary Baki. For inquiries, call 79988000 or text to 7155-8866. Or email to mktgpih@gmail.com

NCSL members are reminded that they could actually take out a loan package which will even come with a discount, to pay for procedures at Pacific International Hospital.

By PIH Mktg and Sr. Bindu

FREE SURGERIES FOR CLEFT LIP KIDS

FREE SURGERIES FOR CLEFT LIP AND CLEFT PALATE WILL BE HELD IN OCTOBER AT THE PACIFIC INTERNATIONAL HOSPITAL COURTESY OF OPERATION OF HOPE DOCTORS FROM THE U.S.A. IF YOU HAVE A RELATIVE WITH CLEFT LIP, PLEASE SEND PATIENT DETAILS EITHER BY FACEBOOK, LIKING FB PAGE "PIHkinini Smile", OR EMAIL publicrelationspih@gmail.com OR TEXT TO 7155-8866.

2015 sponsors: Bougainville Copper Ltd, Brian Bell, Airlines PNG

Be part of the top-tier facility of your profession!!



Nurses, Midwives, and CHW welcome to apply

send your CV to donmary.pih@gmail.com and publicrelationspih@gmail.com or text 7155 8866



Ol Intanel Afeas Dairektoret opisa bai kisim trening

OL memba bilong Papua Niugini Ombusman Komisn (OC) na Trensarensi Intanesenel PNG (TIPNG) I bin sindaun wantaim long trening bilong Intanel Afeas Dairektoret Opis (IADO).

Komisina bilong Royel Papua Niugini konstabuleri (RPNGC), Gari Baki, i opim namba 3 trening bilong IADO long Ogas 3, 2015 long Pot Mosbi.

Dispela kos em i program bilong RPNGC we Australian Federal Polis (AFP) i sapotim na givim mani long holim.

Komisina Baki i tok, "Tupela namba wan kos insait long trening em *disaplin na investigesen* insait long RPNGC."

"Darekta bilong IAD, Victor Isouewas, i redim tupela kos long ol manmeri husat i lainim i ken kisim bikpela save long sait bilong disaplin na teknik bilong wok painimaut, na i gat kliatingting long ol toktok bilong korapsen."

Isouve i tok, "Kos i redim bikpela sans bilong ol 24 opisa bai bungim ol memba bilong OC na TIPNG long kisim bikpela kliatingting olsem, long wanem rot ol i save painim aut korapsen long ol hap bilong gavman na kampani."

Papua Niugini-Australia Polis Patnasip (PNG-App) Misin Komanada Asisten Komisina, Alan Scott, i tok, "Bikpela hap bilong PNG-APP *Wok Wantaim Patnasip* em i bilong wok bung na kirapim namba bilong RPNGC."

"Long pinis bilong dispela kos, ol IADO bai stap long gutpela ples long skruim rot bilong wokim wok painim aut."

"Tingting i stap pinis long moa IAD trening kos bai kamap bihain long dispela yia," Scott i tok.

PNG-APP i go pas wantaim givim mani long holim dispela trening aninit long *Wok Wantaim* sain na em bai pinis long 18 Ogas.



ACP Alan Scott i toktok long taim bilong opim Intanel Afeas Dairektoret Opisa trening.

Australia Palamen Memba kam lukluk raun



PNG IPA Director Angori Wewerang raun wantaim deligesen long PNG. L-R: Save The Children's Stuart Schaefer, Ewen Jones (Memba bilong Herbert), Senator Sam Dastyari, Australian Charge D'Affairs Bronte Moules, PNG IPA Dairekta Angori Wewerang.

SAMPELA Palamen Memba bilong Australia i bin kisim sampela toksave long nupela Pasifik Lidasip na Gavvanens wok eria long las wik.

Dispela lain memba i bungim ol sumatin na i go lukluk raun long Papua Niugini Institut bilong Pablik Edministresen (IPA) long 30 Julai. Ol i lukluk raun tu long ples we wanpela olupela Buli Bif Klap i stap long en, na ples we planti ol bipo taim ol papa bilong nesen i save bung long 1960, long mekim plen bilong kisim independens.

Precinct em i wanpela patnasip namel long PNG na Australia long redim ol pablik sevan lida bilong PNG long bihain taim na long rijon tu, na em i strongim ol patna institusen, Yunivesiti bilong Papua Niugini na PNG Insti-

tut bilong Pablik Edministresen. Sampela wok em bilong sapotim long kamapim nupela kurikulum na nupela ol infrastraksa.

Ol Palamen Memba bilong Australia husat i bin kam em long; Sam Dastyari, Senata bilong Nu Saut Wales; David Feeney, Memba bilong Patman long Victoria; Ewen Jones, Memba bilong Herbert, Queensland; Andrew Broad, Memba bilong Mallee, Victoria; na Timothy Watts, Memba bilong Gellibrand, Victoria.

Deligesen i lukim long ai bilong ol yet wanem kain wok Australia i save givim i go long PG long Pot Mosbi na Goroka long helpim ol pikinini na ol meri wantaim wok bilong Save the Children husat i patna wantaim Gavman bilong Australia.

Ol meri loya i kisim salens

WANPELA kain namba wan bung i kamap long painim aut stat bilong wanpela fomal mentoring program bilong ol meri insait long ligel wok i bin kamap long Pot Mosbi.

Ol 60 meri long pablik na praivet sekta i bung long dispela samit o bung long painim aut wanem mining bilong mentoring, mentoring program bilong ol meri loya bai wok olsem wanem na wanem ol samting ol i nidim long wanpela program olsem bilong ol loya meri long kain kain level long wok bilong ol, na tu ol dispela insait long provins.

"Mentoring i gat bikpela wok long givim ol meri strongpela tingting, sapot na trening ol i nidim long gat olgeta strong, na laik mekim wok," Australia Hai Komisn Minista Kaunsila,

Rod Hilton, i tok long taim bilong opim bung.

Long wankain taim, Ombudsmen, Phoebe Sange-tari i toktok long ol ekspiriens bilong en long dispela ligel sekta na salensim ol meri long wok hat, kamapim ol gol, na lusim gutpela nem bihain.

"Mipela mas gat planti mentoring rilesensip olsem. Mipela ken lus tingting olsem mipela i lusim wok long sampela taim, na olsem ol ekspiriens lain, mipela i mas givim skul toktok long wanpela long winim yumi," Obadsmen Sangetari i tok.

"Yumi i mas redi long kisim nupela salens, kisim na traim. Yu no inap kisim kain sans bihain. Lukluk long ol narapela man na meri na tingim, sapos ol i ken mekim, mi ken mekim

tu." Seketeri bilong Konstiusen na Lo Rifom Komisn, Dokta Eric Kwa i tok, gutpela wok i kamap long promotim jenda ikwalati, tasol i gat planti samting long wokim.

"Bikpela salens em tingting. Noken lus tingting olsem long pes bilong ol no gat toktok, i gat gutpela samting."

Wantaim olgeta toktok ol i kisim long bung, wanpela wok grup bai kamapim wanpela fremwok bilong fomal mentoring program bilong ol meri loya, na ol bai glasim bihain.

Gavman bilong Australia i givim mani long dispela bung olsem promis bilong en long strongim lo na jastis na strongim ol meri wantaim gavman bilong PNG.

William Samb bilong Pangu Pati i winim Goilala sia

LONG dispela bai-ileksen bilong Goilala sia, William Samb bilong Pangu Pati i kamap memba bilong Goilala wantaim 4264 kaun long raun 31 long wan klok apinun long Tunde long Pot Mosbi.

Em i winim kendidet bilong Nesenel Alayens, Alex Hoem Robert olsem 304 moa poin long raun 31 taim Robert i kam bihain wantaim 3, 960 poin.

Ol i bin stopim kaunting long 30 minit long wetim Mista Samb long go long kaunting hap bai ol i tokaut olsem em i win. Dispela bai-ileksen long



Ol wokman long Elektoral Komisn i bisi long kauntim ol balot pepa long Papua Niugini Institut bilong Pablik Edministresen (PNGIPA) long Pot Mosbi.

painim memba bilong hevi i bin kamap long taim pinis long Tunde apinun. Goilala i go gut tru na no gat bilong kaunting inap em i

Tumbuna piksa so bai kamap long musium

NESENEL Musium na At Galeri bai holim wanpela narapela kain eksibisen o piksa so long soim ol tumbuna samting bilong bipo long pablik we ol i no save soim bipo.

Dispela spesol piksa so ol i kolim, *Built on Culture: The Art of Papua New Guinea* bai op long Nesenel Musium na At Galeri long neks mun Septemba.

Bai ol i selebretim kain kain kalsa i kamapim demokresi o fri kantri long Papua Niugini (PNG) inap nau. Dispela piksa so bai soim 100 stail wok bilong han insait long 80,000 droing, kaving na peinting we Musium i save kisim na bungim i stap.


Ol narapela kain ston piksa long tausen yia i go pinis i statim wanpela stori i go het long painim aut we ol i kam long en long ol nupela stail wok.

Ol i kisim ol dispela atifek taim ol i digim graun long painim, ol antropolojis i painim, ol nupela atis husat i mekim long soim spirit bilong independens long ol bilas na ol raiting bai kamapim dispela so.

Dispela piksa so i kisim het tok bilong en namel long politikel developmen long independen bilong PNG, na stat na gro bilong Nesenel Musium na At Galeri.

Built on Culture bai selebretim 40 yia bilong Independens na soim ol stat bilong stail nesenel aidentiti bilong PNG.

Gavman bilong Australia bai sapatim dispela piksa so taim em i op long Septemba long Nesenel Musium long Pot Mosbi.



Ol tumbuna piksa, peinting na kainkain kalsa art bai kamap long musium.

Ol paip na dram ben bilong CS i redi long Independens



Siaman Ben Seketeriet na Hailans Rijon Dairekta Asisten Komisina, Philip Eka i givim mani long Idau Raka bilong DHL Express na Kepten Maraga Heni na Jana Awaita i lukluk.

LONG redi long 40 Independens selebresen ol Koreksenel Sevis (CS) Bag Paip na Dram Ben i baim ol nupela musik samting bilong ben long Skotlan. McCallum Beg Paip Limitet saplaia bilong Skotlan i kisim oda pemen long CS long Jun 17 long mani mak olsem K162, 165.83.

DHL Express long PNG i kisim ol musik samting bilong ben i kamap olsem tu-

pela wik pinis long mani mak olsem K27, 543.51.

Ben Seketeriet na Dairekta bilong Hailans rijon kalabus na Asisten Komisina, Philip Eka i baim K17 496.07 long olgeta sas bilong balus inap DHL na kisim 35 boks i gat ol musik samting. Ol dispela boks i kamap long CS hap long Bomana long dispela wik.

Mista Eka i tok tenkyu long Komisina Waipo na

Koreksenel Sevis Eksektiv Tim long harim askim bilong ol ben na baim nupela musik samting.

"Em i taim bilong selebretim 40 Independens long Septemba 16, na em i gutpela taim bilong baim ol dispela musik samting, long wanem CS i ken stap insait long dispela selebresen wantaim kantri," Mista Eka i tok.

Ol musik samting em 23 bag paip, 19 dram pis wan-

taim bes, tena na sait dram wantaim ol samting bai go wantaim dispela sait dram. Dispela bai kirapim tingting bilong ol memba bilong ben na namba bai go antap long 24 inap 42.

Ol dispela musik samting bai helpim ol long ol bikpela nesenel selebresen, ol pas aut pered, pered bilong Komisina, in haus trening na riabilitesen program bilong ol trening program.

Voice of Melanesia i laikim senis

LIDA bilong Wes Sepik provins na edvoketa bilong Voice of Melanesia, Zackery Manik i givim wanpela 20 pes petisen long memba bilong Nuku na Vais Minista bilong LLG na Inta-gavman rilesen, Joe Sungi long Tunde, July 14 long dispela yia.

Dispela petisen i laikim ol 111 memba bilong palamen na gavman bilong PNG long tokaut insait long 6-pela mun Altimet Sistemetik na Ikonmik Independens bilong ol pipel na kirapim gen Orijinel Komunal Gavman Sistem.

Dispela i bin lukautim PNG long 1971 na kamapim namba 4 han em Ikonmik Han bilong sistem ol i kolim Nesenel Atonomos Ikonmik Kopresen bai i lukautim olgeta Nesenel Ikonmik.

Em i tok ol waitman i bin tokim yumi long bihainim Kapitalis Sistem bilong Palamentri politiks long lukautim gutpela sindaun na intres bilong ol pipel long kantri.

Olsem 40 yia bilong politikel independens Yunaitet Nesens i bin tokaut olsem Model i no bin wok gut long stretim laip na givim ol benefit bilong ol risos long gutpela ikonmik long ol pipel.

Manik i tok tenkyu long Vais Minista long kisim dispela petisen long opis bilong en na em i askim Mista Joe Sungi long kisim go long Praim Minista long makim Nuku Open na ol pipel bilong PNG.

Tisa i wok 40 yia wankain long Independens

Esther Bralyn Wani i raitim

WANPELA tisa i bin stat wok long 1975 taim Papua Niugini i kisim independens na em i tisa yet. Em bai selebretim 40 yia Independens bilong kantri wantaim wok laip bilong em olsem tisa.

Mahiro Laho em i tisa long Tokarara Praimeri skul insait long Nesenel Kapitel Distrik. Em i kam wantaim ol sumatin bilong em long sapatim Wol Yut De taim *Wantok Niuspepa* i bungim em.

Mista Laho i tok, "Mi bin stat wok tisa long Kaintiba long Galp provins long 1975. Ol sumatin long hap i no bin save long Inglis o Tok Pisin. Taim mi save tokim ol long sanap, ol save bihain toktok bilong mi na tok 'sanap'. Mi save go mekim ekxen na ol save lukim na bihainim tasol."

Em i tok ol save putim ol gras sket na i no gat klos bilong ol.

Mista Laho i tok em i go bek long skul long 2001 long mekim diploma kos bikos em i bin kisim praimeri setifiket tasol.

Em i lukim planti senis i kamap long Edukesen Dipatmen olsem pastaim ol kos i bin hat na ol sumatin bin save gat bikpela salens na ol i save long yusim tingting bilong ol. Em i lukim olsem nau wantaim dispela Autkam Bes Edukesen ol sumatin i pilai long edukesen bilong ol.

Em i tok bipo ol sumatin bin gat bikpela intres long skul tasol nau wantaim ol nupela teknoloji tingting bilong ol i senis go long ol nupela teknoloji.

Mista Laho i tok sampela ol salens em olsem bipo planti bilong ol sumatin i bin go long



Mista Mahiro Laho i toktok long Wol Yut De long palamen haus.

ol bikpela skul bikos gat planti spes tasol nau het bilong ol sumatin i paul wantaim ol nupela teknoloji.

Em i tok narapela hevi em populesen i go bikpela na no gat planti skul. Em i tok gavman i mas sanapim planti ol teknikal skul bai ol sumatin long Gret 8 husat i no gat sans long pinisim skul i ken gat sans.

Mista Laho sapos ol sumatin i gat planti sans dispela bai daunim ol hevi i kamap long ol yut.

Mis PNG i givim skul toktok long ol skul

Esther Bralyn Wani i raitim

PLANTI skul insait long kantri i save harim nek bilong ol tisa bilong ol olgeta de na sampela i save les long harim wanpela nek tasol olgeta taim, na ol i save pilim ai slip.

Tasol taim wanpela nupela pes o wanpela biknem man o meri i go long toktok long ol sumatin, olgeta i save ai op long harim ol nupela skul toktok na em save kirapim tingting bilong ol long skul strong na bihainim lek mak bilong husat i toktok long ol.

Mis PNG, Grace Nugi i go raun long ol skul insait long Simbu provins taim em i stap long hap long mekim risets wok bilong em long Wailaip Konsevesen Sosaiti long lukim amas namba bilong ol kain kain pisin ol pipel i kilim long kaikai na yusim ol pisin gras long bilas.

Em i raun go lukim ol skul long olsem Mingende Praimeri, Angangoi Praimeri

na Barawagi Don Bosco Institut.

Mis Nugi i toktok long ol sumatin meri long Mingende Praimeri long wok hat long skul na save long wasim ol yet gut na lukautim ol yet.

Em i tok ol i mekim wanpela liklik wok o ekksesais long mekim aut amas mani long lukautim wanpela bebi inap em wanpela krismas. Ol i lukim olsem em i traipela mani stret long lukautim bebi taim ol i yangpela yet na no gat wok mani bilong ol.

“Bikpela tingting bilong mi em long strongim tingting bilong ol sumatin long bihain driman bilong ol na no ken pilim no gut sapos edukesen sistem i no kisim ol long wanem i no olgeta sumatin bai go long ol hia skul o bikpela skul. God i blesim yumi wan wan wantaim wok bilong yumi, taim yumi luksave long dispela long mekim bilum, gaden o lukautim ol netsa yumi mas mekim gut,” Mis Nugi i tokim ol sumatin.



Mis PNG Grace Nugi i toktok long ol sumatin long Mingende Praimeri Skul na ol sumatin i laik tru long harim toktok bilong em.



Ol het tisa wantaim Grace bihain long em givim skul toktok long ol sumatin long Angangoi Praimeri long Simbu provins.



Kalsa stret!



Ol sumatin bilong Don Bosco Technological Institute i bilas long kalsa bilong ol na mekim liklik kalsa so bilong ol long skul bilong ol long makim 200 yia Baisenteneri long olgeta Institute. DBTI long dispela wiken i amamasim dispela wik wantaim Talen So long Mande, Kwiz long Tunde, Mini Kalsa So long Trinde, Spot na Amamas De long Fonde, Yut Kemp long Fraide na Sarere na long Sande ol bai mekim bikpela Lotu long Taurama Aquatic Senta na bihain bai pinisim long Motorcade. Long poto ol sumatin bilong Hailen i soim bilas na danis bilong ol. Poto Stori: Nicky Bernard.

Midia i gutpela patna bilong Helt Promosen

Frieda Sila Kana i raitim

NESENEL Dipatmen bilong Helt i tok, midia o niuspepa, redio na televisen em i wanpela namba wan patna bilong helt long karim trupela tok i go aut long komyuniti na ol pipel.

Ol bikman na meri bilong helt i bin mekim dispela kain toktok long stat bilong dispela wik taim ol i singaut ol niusman na meri long wanpela kibung long Lamana Hotel long tokaut long dispela nupela moa we bilong givim banis marasin long ol pikinini we Praim

Minista Peter O'Neill i bin opim long aste.

I gat planti wok bilong kamapim gutpela sindaun na wanpela bilong ol em long ol pipel i mas kisim gut toksave na bai ol i bringim pikinini long kisim ol banis marasin na banis sut long klinik o wanem hap ol helt opisa i wok long ranim program.

Seketeri bilong Helt, Pascoe Kase, Deputi Helt Seketeri, Dokta Paison Dakulala, Eksekyutive Menesa bilong Praimeri Helt, Dokta Sibauk Bieb, na Menesa bilong Famili Helt, Dokta William Lagani wantaim Nesenel EPI Kodineta, Gerard

Sui na ol dona patna olsem Wol Helt Ogenaisesen, GAVI Intenesenel, UNICEF i bin stap long dispela taim long strongim toktok bilong yusim midia olsem wanpela rot bilong bringim gutpela tok save i go daun long ol gras rut.

Dokta Sibauk Bieb i tok, "Sapos midia i no gat, ol pipel bai no inap save long ol bikpela toksave bilong helt. Olsem na mipela i laikim bai midia i kisim gut ol bikpela toksave na salim i go aut wantaim gutpela tingting na i no ken givim toktok ino gutpela."

Dokta Biebe i tok

wanpela namba wan tingting bilong praimer i helt em long wok bung wantaim ol narapela long winim ol sik olsem EPI.

"Long dispela tupela yia 2014 i kam long 2015 mipela putim ol wok long oda na mipela i tokaut olsem EPI (Extended Program on Immunisation) bilong mekim wok bilong givim banis marasin long ol pikinini i go bikpela na tu long Wara Senitesen na Haijin program. Sapos EPI i wok gut, em bai daunim stret, namba bilong ol mama na pikinini we i save dai long olgeta yia," Dokta Bieb i tok.



Dokta Sibauk V Bieb, Eksekyutive Menesa bilong Praimeri Helt long Nesenel Dipatmen bilong Helt (NDoH).

Gavi, Vaksin Alaiens helpim long rausim MR na Polio

Frieda Sila Kana i raitim

GAVI, Vaksin Alaiens em i wanpela bikpela ogenaisesen long wol we i

save helpim ol kantri i no develop yet na i no gat planti mani, long baim ol vaksin marasin bilong ol sampela sik inap long kamapim bagarap long bodi na dai.

Gavi, Vasin Alaiens i save stap long Geneva, Swiselan. Em i wanpela global patnasip we i save bringim olgeta pablik na praivet sekta long wol wantaim wanpela tingting tasol long banisim ol pikinini long ol i no ken kisim ol sik we i gat marasin long stopim.

CEO bilong Gavi long Esia Pasifik, Mis Helen Evans i bin kam long dispela wik long witnesim Praim Minista Peter O'Neill i makim maus bilong gavman na tok orait long nupela Misels/Rubela vaksin na IPV marasin bilong polio.

Bai em i go insait long ol program bilong bebi klinik bilong banis sut long taim ol i 3-pela mun i go inap long 15 krismas.

Ol i save wok long helpim ol kantri we i no gat planti samting o mani. Mak bilong dispela em olsem wan, wan manmeri na pikinini i save kisim tasol US\$1580 olsem Gros Net Inkam long wan wan yia. Papua Niugini em i wanpela bilong ol dispela 73 kantri nau i stap long lista bilong ol.

Program bilong Gavi long helpim i save go inap long 5-pela yia na sapos insait long 5-pela yia na sapos ikononi bilong kantri i kamap gut na ol i gat inap mani, orait gavman bai kisim dispela wok. Em i tok 5-pela yia moa bihain dispela kantri inap yet long baim ol vaksin long dispela gutpela prais.

Mis Evans i tok olsem i gat rot bilong pinisim olgeta kain sik nogut olsem polio we i save bagarapim bodi na kamapim dai tu.

Wankain long misels na rubela. Dispela rot em i bilong givim ol vaksin o banis marasin long lukautim ol taim ol i liklik yet. Tasol gavman i mas gat laik long bringim i kam insait.

"Mipela amamas tru long PNG gavman wantaim Praim Minista i opim han stret long kisim dispela bikpela helpim i kam insait long kantri," Mis Evans i tok.

Em i tok taim bebi i blut nating yet insait long bilum long bel bilong mama na insait long namba wan tripela mun, sapos mama i kisim sik rubela (bipo German misels) bebi bai inap kisim CRS, em i sik misels insait long bel bilong mama yet.

Mama inap kisim dispela sik long taim narapela husat i gat dispela sik i stap klostu long em o kus.

Praim Minista strongim wok bilong nupela Polio na Misels/Rubela vaksin

Frieda Sila Kana i raitim

PRAIM Minista bilong Papua Niugini, Peter O'Neill long aste i opim program bilong helt sevis bai yusim nupela Rubela/Misels banis marasin wantaim IPV narapela banis marasin bilong pinisim sik polio olgeta long wol.

Imunaisesen o givim banis marasin long ol pikinini, em i namba wan long wanpela kantri bai stap helti na strong. Olsem na taim Praim Minista O'Neill i wanbel long opim dispela nupela level bilong kisim banis marasin insait long Stet Fanksen rum bilong haus palamen, em soim olsem gavman i gat luksave long wanem bikpela wok dispela wok inap mekim.

Nesenel Dipatmen bilong Helt wantaim ol developmen patna i luksave long wanem wok bilong givim ol banis marasin olsem na ol i opim dispela Spesel Program bilong Strongim EPI (SIREP) Plus, long bringim tupela nupela vaksin long go wantaim ol imunaisesen program bilong ol helt sevis long kantri.

Dispela tupela nupela vaksin em Misels Rubela (MR) na Inactivated Polio Vaksin (IPV) long strongim wok bilong banisim ol pikinini krismas bilong ol i tripela mun i go long 12 mun long IPV na ol pikinini krismas bilong ol 9 i go long 15 long kisim MR.

Em i wanpela hap bilong wok nau i kamap long wol long givim ol banis marasin long 126 kantri i go inap pinis bilong 2015. Em i wanpela bikpela wok tru bilong givim banis marasin long wol we em i go hariap.

Em i kisim fanding i kam long Globol Polio Eradikesen Inisetiv (GPEI), (GPEI), na dispela sapot i kam go long Gavi, Vaksin



Meri bilong Praim Minista, Linda Babao i toktok wantaim wanpela mama long taim bilong ol bebi i kisim imunaisesen long Sentral provins. Wantok fail foto

Alaiens, WHO na UNICEF.

Nesenel Dipatmen bilong Helt i makim gavman na ol pipel long mekim dispela wok bilong strongim ol vaksin na program bilong kisim banis marasin bilong Misels/Rubela (MRS) na IPV o narapela marasin bilong polio we i no gat binatang bilong polio long en.

Gavi Vaksin Alaiens Eksekiutive Opisa long Esia-Pasifik Rejon i tok polio em i bin pinis olgeta long PNG long yia 1997 tasol i gat birua i stap yet bikos long OPV o

givim drop long maus em i gat liklik hap bilong binatang i stap na sampela taim em inap kamapim sik gen na dai tu. Olsem na nupela kain vaksin em bilong kisim long sut na dispela em bai kilim i dai olgeta binatang.

"I no gutpela long ol pikinini i dai o kisim wanpela bagarap bikos ol i no kisim banis marasin we i stap pinis long wol tasol ol dispela vaksin marasin em i bikpela mani tumas. Em i nidim gavman long tokaut long soim laik long bringim dispela ol vaksin i kam insait long

kantri na helpim long skruim wok i go. Olsem na mipela i amamas tru long Praim Minista i tok orait long kirapim dispela imunaisesen program long dispela wik," Mis Evans i tok.

"Long baim wanpela MR vaksin, kain olsem vaksin bilong numonia, numo koko em i US\$3.10 long baim tasol Gavi Vaksin Alaiens baim tasol long US\$.95 long wan wan vaksin. Gavi baim dispela na ino PNG gavman," Mis Evans i tok.

IPBC i gat nupela GM bilong ol projek divisen

INDEPENDEN Publik Bisnis Kopresen (IPBC) i makim Carolyn Blacklock i kamap Jenerel Menesa (GM) bilong ol projek wantaim ogenaiesen. Em bai go het long karim aut planti namba bilong infrastraksa i gro bikpela na ol sekta projek insait long wok bilong en.

Dispela posisen i go pas long planti nupela projek na ol i stap pinis na ol invesmen insait long IPBC na ol bisnis bilong gavman.

IPBC i karim aut ol gutpela wok long ol projek olsem long Lae Tidal Basin, Pot Mosbi Surij Sistem Apgrid projek (POMSSUP), Ramu 2 Haidro ilektrik projek na Pot Mosbi Pot Rilokesen projek.

IPBC bai go het long go pas



Nupela GM bilong projek divisen bilong IPBC, Carolyn Blacklock.

long developmen bilong ol projek we bai givim PNG i kisim benefit long en longpela taim.

Ekspiriens bilong Mis Blacklock olsem save meri long sait bilong infrastraksa fainens na implementesen bai bikpela aset o gutpela samting long IPBC.

Carolyn i bin bikpela long bus bilong Not Wes Kwinslan. Em i bin wok gut long benking, namba wan insait long ritel, komesel, invesmen benking wantaim ANZ, Westpac na bihain wantaim Intanesenel Fainens Kopresen (IFC) we Carolyn i bin wok olsem Residen Representitiv long Papua Niugini long 2010 inap 2015.

Carolyn i bin wok long ol senia fainens wok long Esia na Pasifik long samting olsem 10-pela krismas na em gat ekspiriens long infrastraksa fainens.

Long wok bilong em olsem bos bilong IFC, praivet sekta han bilong Wol Benk, Carolyn i bin wok strong long long helpim long mani sait wanpela namba wan PNG papa graun kampani na kamapim Bisnis Koalition bilong Wimen.

Carolyn i bin wok liklik taim long konstraksen bisnis i na em i bin lukautim bikpela skel infrastraksa developmen long Pasifik long wok bilong em olsem Pasifik Rijnol Menesa bilong Nu Silan kampani, Hawkins Infrastraksa.

Em i gat posgreduet digri long Intanesenel Developmen long Deakin Yunivesiti long Australia na em i save laikim PNG na save wok long karim aut infrastraksa na ol sevis long ol pipel.



Yut, Meri na Famili

Pastor

Barbara Lunge

Stap insait long Kingdom bilong God na kisim gutpela blesing

SENIS bilong ikononi nau i kam long Papua Niugini.

Kantri bilong yumi nau i kamap kingdom nesen olsem na olgeta mani we yumi lusim long ol ausait kantri long bipo taim yumi no gat gutpela save long Tok bilong God, bai kam bek long yumi, stat long nau.

Long mun bihain yumi bai selebretim 40 yia bilong independens o sanap long yumi yet long kisim ol gutpela samting olsem milk na hani we baibel i tokim ol pipel bilong Israel long en.

Olsem wanpela Kristen kantri bai yumi lukim gutpela blesing bilong God long olgeta eria bilong laip olsem politik, sosel, ikononik, na lotu long God tru. Aisaia 23:17-18 i tok long en.

Wanpela bikpela evanjelisem program bai kamap long pinis bilong taim bilong kamautim kaikai. Kamapim Tok Hait 14:15, "Na narapela ensel i kam ausait long haus bilong God.

Em i singaut strong tru long dispela man i sindaun long klaut olsem, 'Kisim naip bilong yu na katim kaikai. Olgeta kaikai bilong graun i mau pinis, olsem na nau em i taim bilong katim dispela kaikai.'

Wok bilong kamautim kaikai bai bikpela tru na olgeta mani mas i stap long han bilong ol stretpela manmeri long em i ken pinisim wok bilong en.

Buk Gutpela Sindaun 2:6 i tok, Bai gat bikpela amamas bikos bai gat bikpela selebren bilong ol famili i kam bek bung wantaim na planti moa stretpela pasin bai kamap.

Ezra 6:8-10.. "Olsem na nau mi tok strong long yupela i mas helpim ol long wokim dispela haus.

Yupela i mas stretim pe bilong ol wokman na taim ol i laik baim samting bilong wok, orait yupela i mas givim mani kwiktaim long ol.

Yupela i mas kisim dispela mani long takis mani yupela i save kisim long provins long hapsait bilong wara Yufretis.

Yupela i mas mekim olsem, na bai wok i no ken pundaun.

Sapos ol pris bilong Juda i laik yupela i givim wanem samting long ol bilong mekim ofa long God bilong heven, orait yupela i mas givim long ol long olgeta de.

Sapos ol i laikim yangpela bulmakau o sip-sip o pikinini sip-sip o wit o sol o wain o wel bilong diwai oliv, orait yupela i mas givim long ol bilong mekim ofa.

Yupela i mas mekim olsem, bai ol i ken mekim ol gutpela ofa long God bilong heven na bai em i ken laikim ol dispela ofa.

Na ol i ken beten long God long mekim gut long mi na long ol pikinini man bilong mi."

Ol husat i givim samting o helpim wok bilong God bai lukim bikpela blesing bilong God i kam na winim ol.

Meri Usino wokim naispela rurel pisa stail

James G. Kila i raitim

OL RUREL mama long ol viles na haus lain long PNG i gat stail long wokim naispela kaikai we i ken pulim ai na laik bilong ol manmeri i kam long taun na siti tu.

Sampela taim i go pinis, ol mama grup bilong Maigari insait long Inlen Paiplain eria bilong Ramu Projek long Madang i bin redim wanpela seremoni long tok welkam long wanpela opisal konsalten meri bilong Wol Benk i go long eria bilong ol.

Long dispela taim ol mama i bin redi long sainim ol agrimen na pepa wok long kisim nupela PMV trak aninit long Wimen in Maining helpim i kam long Nesenel Gavman.

Planti ol gutpela toktok na salens i bin kamap. Bihain long ol toktok i bin gat naispela kaikai ol mama i redim.

Wanpela mama long dispela taim tu i bin redim 'pisa' stret na em i wokim long rurel stail stret. Tasol pisa i teis na i gat kala na swit we i wankain tru olsem ol pisa we ol lain long taun na siti

long PNG i save kaikai long ol bikpela hotel na haus kaikai.

Meri husat i redim dispela naispela pisa em Jacinta Thomas Maimai na mama ya i wokim wantaim flaua na stailim wantaim sosis na tu kala antap long pisa i stail moa yet. Em i yusim ol kawawar na lombo bilong bus na teis bilong dispela pisa tu i go nais tru taim ol manmeri i kaikai long dispela taim.

Dispela konsalten bilong Wol Benk tu i bin teistim dispela pisa bilong Usino na i tok "Hm-mmmmm...yummy!"

Planti ol PNG taun lain i teistim dispela pisa bilong Usino i tok em i swit stret na ol i laikim moa yet.

Wanpela long ol lain husat i amamas long kaikai dispela pisa em wanpela agrikalsa opisa bilong Ramu NiCo, Samuel Masawa na em wantaim bos bilong em Allan Wahwah i traim pisa ya na i tok tru tumas, ol mama long rurel eria i gat gutpela save na stail long wokim kain kain kaikai we i ken winim laik na tingting bilong ol lain long taun na siti tu wantaim.



Jacinta Thomas Maimai i holim naispela pisa ol i wokim long rurel ples long Usino na i givim ol gest long bung long Usino kaunsil semba. Foto: James G.Kila

Ol dokta meri bai gat bung

OL Wimen Dokta Asosiesen bilong Papua Niugini bai go pas long 51 Anuel Medikel Simposium long Pot Mosbi long neks mun.

Dispela bung bai kamap long Gateway Hotel long Ogas 30 inap Septemba 6.

Het tok bilong dispela bung em "Advancing Womens Health Through Innovation". Bikpela tingting bihain long dispela em long kamapim na strongim ol rot long helt sistem na lukluk long helt bilong ol meri.

Wanpela ges spika long dispela bung em, Profesa Khunying Kobchitt Limpaphayom bilong Yunivesiti ov Chulalongkorn long Bangkok, Tailan.

Em i gat ekspiriens long risets na kamapim ol program long riprodaktiv helt.

U.S bisnis meri i kam long PNG

WANPELA save meri long bisnis long Amerika i kam long Papua Niugini long toktok long ol meri long ol rot bilong strongim na groim bisnis.

Samira Cook-Gaines i bin serim ol rot na plen bilong painim ol nupela prodak na rot bilong karim aut ol sevis bai amamasim ol pipel long baim na strongim laik long baim kaikai.

Em bin toktok tu long ol stail rot long bihainim na putim bisnis bilong ol na bai no gat resis.

Mis Cook-Gaines i bin tok-



Samira Cook Gaines

tok tu long luksave long ol hevi insait long bisnis bipo ol i kamap, na abrusim ol hevi

insait long bisnis, na em i toktok wantaim wan wan man long skulim ol long mekim bisnis.

Long wankain taim, em i wok olsem Sif bilong Sivil Rait na Ikononik Empawamen bilong Nesenel Komyuniti Reinvestmen Koalisen (NCRK) we em i save givim strongpela lidasip na daireksen long mekim mani na mekim ol liklik bisnis bilong NCRK Hausing Kaunseling Network, Nesenel Neiba Sivil rait program, na 4-pela liklik bisnis developmen senta long Washington DC na Nu Yok.

Guruf perisina i kisim salens long sapotim sios wok

James G. Kila i raitim

TAIM ol pipel i givim graun bilong ol long kamapim sios, ol i mas givim moa sapot tu i go long wok bilong sios long eria bilong ol.

Dispela em strongpela salens Gavana bilong Morobe, Kelly Naru i bin givim long kongrigesen bilong Guruf peris long Kaiapit insait long Yabim seket bilong Evanjelikol Luteran Sios bilong PNG (ELC-PNG) long Morobe provins.

Mista Naru i bin stap long Kaiapit eria long makim graun wok bilong nupela sios na tu, i bin givim K110,000 i go long kongrigesen long wokim nupela sios bilong ol.

Dispela mani sapot i kam long Morobe provinsal gavman.

Gavana Naru husat i wanpela strongpela Luteran man na lida i salensim ol pipel bilong Guruf peris olsem taim ol i amamas na givim graun bilong ol long wokim nupela sios, ol i mas amamas tu long givim moa sapot i go long wok bilong Sios.

Em i tok Morobe provinsal gavman i givim K110,000 long ol pipel bilong peris we i gat 6-pela kongrigesen insait long Guruf peris tasol ol pipel i mas yusim tu ol risos bilong



Morobe Gavana Kelly Naru i save go pas long sapotim sios wok na i givim salens long ol pipel long sapotim sios.

ol long sapotim na strongim wok bilong sios.

Gavana Naru i salensim ol pipel olsem sapos ol i gat diwai ol i mas katim na givim timba long sanapim pos bilong sios. Sapos ol i gat

wesan ol i mas helpim na miksim wesana na wokim simen insait long haus lotu. Dispela em bikpela ofaring ol i wokim i go long God.

Insait long dispela sere- moni long las wik i lukim tu

Onga Waffa LLG i tokaut promis long sapotim Guruf peris wantaim K10,000 na presiden bilong Umi/Atzera i promis long sapotim wok bilong sios wantaim K5000.

Lapun Katane i sanap strong long bilip

Paulus Tali i raitim

MASKI Lapun Katane i gat 96 krismas, em i sanap strong yet long bilip na prea.

Bipo long Wol Woa 2 i bin kamap, Katane Mutang bin liklik yet.

Mama i bin karim em long 1900 na long 1922, em i maritim Mista Mutanakec husat i wanpela bilong ol namba wan evanjelis lain i bin go long Finsafen na go long Lihona long Kainantu insait long Isten Hailans long taim bilong Wol Woa 2.


Lapun Meri Katane nau i gat 96 kridsmas.

Em i tok taim em i liklik yet, woa i kamap. Ol i stap wantaim pret taim ol harim pairap bilong gan na bom, tasol long lukaut bilong God Papa em i bin stap inap taim em i bungim Evanjelis Mutanakec na maritim em.

Bikpela wari na tingting bilong en em, ol Japan no ken mas kilim em.

Namba 3 pikinini man bilong em, Harry Mutang, nau em i bisnisman long Ramu Suga kampani.

Em i gat liklik Bekeru we em i save kukim bret na skon, na salim long helpim ol wok-



SANAP STRONG LONG BILIP NA PREA: Lapun Katane em i strongpela Luteran Sios bilip mama na bubu. **Poto: Paulus Tali**

man meri bilong Ramu Suga na ol ples man meri tu taim ol i kam mekim soping long Ramu Suga.

Pikinini bilong Lapun Katane i tok ol lain wanwok bilong papa Mutanakec i dai, tasol lapun meri bilong em i stap yet laip.

Long Oktoba 2015, Lapun Katane Mutanakec bai lukim

97 bonde bilong em.

Em i stap wantaim namba tri pikinini bilong em, Harry Mutanakec, long Ramu Suga.

Stap bilong lapun Katane em i save tokim ol tumbuna bilong em wantaim pikinini bilong em olsem, "Oltaim long laip bilong yumi, yumi no ken tru long lusim prea.

Mi bilip tru God Bikpela em i stap na was oltaim long yumi. Olsem na wanpela taim long laip bilong yumi, yumi no ken tru lusim lotu. O sapos yumi no go long lotu, lotu long bel na tingting bilong yumi wan wan olsem mi sin manmeri, God yu kam i stap wantaim mi long dispela rot bai God Papa na Holu Spirit bilong em inap blesim yumi wan wan long nau na oltaim oltaim,"Katane i tok.

Em i tok yumi ol manmeri na pikinini bilong tude i mas save moa olsem long God Papa tasol na yumi kamap na yumi lukim olgeta samting kamap tru long kriesen bilong God tasol. Yumi mas save Jisas em namelman o senta pos long lukluk bilong yumi, na wanem liklik samting yumi mekim tasol em, oltaim yumi mas tingim Jisas Kraus em i stap namel long yumi."

Mista (Harry) Mutnanakec i gat liklik bekeri bilong em na em i save givim ofa i go long sapotim wok sios long dispela bekeri bilong em.

Harry i save helpim husat sios man i painim hevi.

Em givim helpim bilong em bikos God i blesim mama na famili bilong em.



STORI TASOL
wantaim
Fr Paul Liwun

Nem kristen, pasin haiden

I GAT naispela stori insait long Buk bilong **Kisim Bek/Exodus** we God i bringim Israel i go long wanpela ples bilong ol Haiden long kantri Kana we i pulap long planti samting.

God i laikim ol lain Israel tumas. Planti taim ol i wokim rong, God i redi oltaim long pogivim ol (Namba 13: 28).Ol manmeri bilong Kana i olsem dog, ol i no inap kisim salvesen (Matiu 15:26).

Jisas i kamapim wanpela nupela samting. Em i presim meri bilong Kana, (Matiu 14: 32). Jisas i tok klia, em i no painim wanpela man o meri bilong Israel i gat strongpela bilip olsem dispela meri bilong Kana. (Matiu 8:6 na Mak 6:6)

Taim mi harim na ridim long Santu Misa long Trinde, Ogas 6, 2015, mi kisim bikpela salens tru. Yumi save praud long kamap Kristen na stap insait long wanpela Kristen kantri, Papua Niu Guinea. Mi bilip Jisas tu i amamas bikos yumi kamap disaipel bilong em.

Tasol Jisas i no laik bai yumi kamap disaipel bilong em long nem tasol. Yumi kamap Kristen i no long Baptais tasol. Yumi mas inap long mekim wok bilong em. Yumi mas soim bilip bilong yumi long em olgeta de.

Yumi stap long Kristen kantri wantaim Kristen nem, na salens bilong yumi nau em: **"Tru tru yumi soim pasin bilong Kristen long laip bilong yumi?"**

Mi pret no gut ol lain manmeri i no kisim Baptais na ol i no Kristen, tasol pasin na laip bilong ol i winim pasin na laip bilong yumi ol Kristian manmeri.

Na em i tru. Yumi inap lukim olgeta de long komyuniti bilong yumi.

I gat planti kristen marit i bagarap. Ol i wokim promis long taim bilong marit long laikim narapela narapela inap long indai. Tasol planti marit man na meri i no sindaun gut, i no lukautim gut pikinini...man i paul wantaim narapela meri. Meri tu i paul wantaim narapela man.

Ol Kristen manmeri i mas laikim narapela narapela.

Tasol samting yumi lukim olgeta de long laip i narakain. Pait i kamap long famili/komyuniti, kilim indai narapela narapela, stil, rep, tok nogut na planti samting moa.

Yumi save tok strong long narapela i mas rispektim yumi. Tasol yumi tu i mas soim wankain rispek long ol.

Wanpela meri i stap long wankain strit olsem mi long Konedobu. Wanpela de em i kam askim mi long raitim gutpela referens leta bilong em. Mi askim em, wanem gutpela pasin bilong yu bai mi raitim? Bikos mi lukim pasin long marit bilong yu na pasin bilong yu insait long strit bilong yumi i no gutpela tumas. Mi no laik mekim wanpela giaman gutpela referens leta. Yu dispela meri, wantaim man bilong yu i bin tok nogut long mi las yia. Yu dispela meri i sapotim man bilong yu long brukim windua glas long kar bilong neiba bilong yumi ya. Yu dispela meri i raun raun wantaim yangpela man, tasol yu marit na i gat tripela pikinini pinis ya? Nau yu askim mi long raitim gutpela referens olsem yu wanpela gutpela Kristen meri o yu wanpela lotu meri?

Na em i tok; "Tasol yu Pater ya, yu mas pogivim mipela".

Mi askim em gen, **"wanem taim yu bin kam na tok sori long pasin no gut yu wantaim man bilong yu i bin mekim long mi?"**

Wanpela de, sampela lain i askim Mahatma Gandhi bilong India. **"Skul bilong yu i olsem skul bilong Jisas. Bilong wanem yu no laik kamap Kristen?"**

Gandhi i bekim: **"Tru, mi gat bikpela rispek long Jisas. Tasol mi bai no inap kamap Kristen. Bikos laip na pasin bilong planti Kristen manmeri i no Kristen".**

Husat i ritim dispela stori, mi askim yu nau: **"Olsem wanem long Pasin bilong yu?"**

Yu ting Baibel ol i laik putim long Palamen haus bai besisim stil pasin bilong ol MP bilong yumi?



KOMENTRI

Ol pipel bilong Manam i nidim helpim nau yet

WANPELA bikipela hevi nesenel gavman, wantaim provinsal na lokal level gavman i no save hariap long stretim, em long helpim ol pipel husat i kisim bagarap long ol neturel disasta olsem maunten paia, tait wara na guria na graun bruk i bagarap ples.

Tude yumi lukim ol pipel bilong Manam ailan long Madang i wok long kisim taim yet long maunten paia.

Sampela bilong ol husat i stap long ol kea senta long Bogia long 2005 i kam inap nau, i sindaun olsem ol refuji bilong narapela kantri bikos ol i tok i no gat wanpela luksave i kam long gavman long dispela kain laip ol i bungim nau.

Long taim Manam i paia na gavman i muvim ol pipel i go long bikples, ol i ting bai ol i stap sotpela taim tasol na ol i kirap lusim ples na go.

Bihain gavman i tokim ol olsem ples bilong ol i no seif tumas na ol i no inap go bek, bai ol i stap long kea senta inap gavman i painim narapela hap we ol i ken go sindaun long en. Planti yia i lus nau na ol i stap yet long ol dispela kea senta.

Ol papagraun long dispela hap tu i no amamas long ol i yusim graun long wokim gaden o mekim ol arapela wok.

Olsem na ol i stap tasol na pilim olsem ol i refuji bikos ol i sindaun long graun bilong narapela man.

Em wanem kain pasin yumi mekim long ol pipel bilong yumi yet?

Manam i pairap gen tupela taim nau na ol lain husat i stap yet long ailan i kisim taim. Sit bilong paia i bagarapim ol gaden kaikai na wara bilong dring long ailan.

Ol pipel i wari bikos i no gat helpim i kam hariap long gavman. Ol helt opisa i wari long ol pikinini i kisim sik long bel bikos wara bilong dring i bagarap.

Praim Minista i tokaut long dispela wik olsem nesenel gavman bai helpim ol pipel bilong Manam.

Nesenel palamen i no hariap long tok orait long dispela Manam Restoresen Bil o lo i tok klia long we ol pipel bai sindaun na ol arapela wok bilong lukautim ol.

Long mun Novemba las yia, Palamen i tok bai ol i paitim toktok na givim tok orait tasol i no gat wanpela samting i kamap.

Gavana bilong Madang na ol lida bilong Manam i wok long go kam long Mosbi long lukim sapos ol memba bilong palamen bai tok orait, tasol i nogat.

Praim Minista i tokaut nau olsem bai ol i toktok long dispela Bil long mun Oktoba taim palamen i bung gen.

Dispela i gutpela nius, tasol long taim ol pipel bilong Manam i wetim palamen long givim tok orait, ol i mas lukim sampela helpim i kam long gavman nau yet.

Bikipela mani i go long wan wan distrik long bringim sevis i go long ol pipel.

Orait long taim ol pipel bilong Manam i sindaun long kea senta long bikples, sampela mani long baset bilong distrik i mas go long ol sevis bilong helpim ol.

Ol i karim bikipela hevi i kam



inap nau na i mas gat luksave long sindaun bilong ol.

Tude, i gat planti politik tumas namel long ol nesenel lida na ol lokal lida tu na ol tarangu pipel i wok long kisim taim yet na i kamap

olsem ol refuji.

Watpo na PNG i save paitim bros oltaim long ol kain samting olsem wel na ges na gol na kopa, long ai bilong ol narapela kantri na hia long ples bilong yumi yet, sin-

daun bilong ol pipel i no stret.

Gavman i gat inap memba long tok orait long ol gutpela lo bilong helpim pipel, orait, yusim dispela namba long palamen long stretim kraik bilong ol pipel bilong Manam.

Manmeri wet yet long kisim helpim long Egrikalsa Dipatmen

Stat long dispela wik, yumi gat nupela kolom, **SKELIM TINGTING**.

Dispela kolom bai glasim na kirapim strong tingting long ol samting i wok long kamap insait long komyuniti, distrik, provins na kantri. Ritim long skelim na kisim save long namba wan hap nau.

EGRICALSA o wok didiman i wanpela long ol bikipela sekta olsem, helt, edukesen, rot, pawa, komyunikesen na wok bisnis long sampela ol kantri. Long Papua Niugini gavman i givim gutpela luksave long dispela sekta. Dispela em bikos long 2015, long K16 bilien Mani Plen, em i givim K73,158.8 milien I go long Egrikalsa sekta. Dispela i winim K46,581.7 milien mani em i bin givim long 2014 K13 bilien baset bilong en.

Long 2015 mani plen, egrikalsa sekta i wanpela bilong ol 5-pela praioriti o namba wan sekta gavman i laik sapotim na dispela ol hap em: Strongim ol sekta o hap we



wantaim **Paul Zuvani**

bai sapotim gut ol manmeri;

Painim ol gutpela rot bilong karimaut gut wok sevis na developmen plen bilong en;

Putim mani i go stret long ol provins na ol distrik na kisim gut ripot bilong wok bilong dispela ol mani;

Skruiim yet sapot bilong en long helt, edukesen, rot na bris, agrikalsa; na

Lo na Oda wantaim wok bilong Ami na Woda (Koreksenenel Sevis).

K73,158.8 milien i bikipela mani na manmeri i ken amamas long dispel plen.

Tasol askim i stap long we dispela mani i stap o we em i

go long em? O sapos i gat plen long yusim dispela mani yet na we stap dispela plen? O sapos Dipatmen i yusim sampela mani pinis, we stap ripot bilong dispela ol mani?

Dispela ol askim i kamap bihainim kain stap ol manmeri i stap long em bikos i no gat wanpela tok klia i kamap bai ol manmeri i save helpim i go long em.

Planti bilong ol manmeri i stap long ples long ol ruel eria we ol i stap long strong bilong kakau, kopi, kokonas, welpam o gaden kaikai.

Nau yet, planti bilong dispela ol samting i gat sik na olsem manmeri i no inap kisim gutpela helpim long sait bilong mani long sapotim ol yet.

Na bihainim mani gavman i makim long mani plen, ol manmeri i wet yet long lukim o harim sapos helpim i go pinis o bai go bilong pinisim sik na strongim kakau, kopi na kokonas indastri?

Ol i laik save Minista bilong Egrikalsa wantaim Dipatmen bilong en bai yusim dispela mani long helpim ol o nogat?

O sapos em i givimi pinis helpim em i mas kliapela long hap na hamas helpim em i givim pinis.

I gat ol hevi i bungim yet dispela sekta olsem:

No gat maket o gutpela ples bilong mekim maket;

No gat rot o bris bilong kisim samting i go long maket o salim samting bilong ol;

Ol didiman opisa i no mekim patrol o go raun helpim ol manmeri long wok didiman bilong ol;

Sik bilong kes krop olsem sik kakau, kopi, kokonas, banana i stap yet;

Papagraun i no redi long givim graun long wok didiman o sanapim maket na

Pasin korapsen long stilim na yusim nating mani gavman i givim.

Tok tenk yu na amamas i go long gavman long givim gutpela luksave tasol inap long sampela ol hevi we mipela i tokaut long em i pinis manmeri bai wet yet long kisim gutpela helpim long Egrikalsa Dipatmen.



Published Weekly, Thursday, for Word Publishing Company, Ltd.

P.O. Box 1982, Boroko, NCD
Papua New Guinea

Telephone: (675) 325 2500

Fax: (675) 325 2579

Email: editorial@wantok.com.pg

Websait: www.wantokniuspepa.com

Pe bilong wanpela yia, 52 niuspepa

Ples:	Air:
PNG	K220.00
AUSTRALIA	US\$110.00
ASIA PACIFIC na JAPAN	US\$150.00
AMERICA na EUROPE	US\$210.00

General Manager
Elizabeth Konga

Editor
Veronica Hatutasi

Published at Able Building Complex, Sec 58 Lot 02, Waigani Drive.

Word Publishing Company Limited is owned by the four major churches of Papua New Guinea - Catholic 55%, Lutheran 25%, Anglican 10%, United Church 10%. The company reserves the right to accept or reject any advertisement or other material submitted for publication which it deems contrary to the public interest at its absolute discretion. The publisher's general term acceptance are available at Word Publishing Company Ltd and are set out full on the display advertising form.

Ol poto nabaut



ZUMIN GRAN SOSPEN:

Wokim ol graun pot i wanpela samting i wok long lus long dispela kantri. Tasol ol dispela man bilong Zumin long Morobe provins i no lus tingting long wokim ol graun sospen na kundu, olsem dispela piksa i soim. **Poto: Don Niles**



PNG i gat planti gutpela samting na tu, ol hap we ol ovasis na asples turis i ken go raun na lukim, olsem ol dispela long poto.

SALAMAUA: Salamaua long Morobe Provins i wanpela ples i gat ol gutpela samting ol turis i save go lukim. Hia yumi lukim MV Caledonian Sky wantaim ol turis i go sua long nambis bilong Salamaua. **Poto: Paulus Tali**



SIMBAI: Ol lain Simbai long Madang provins i laik go long ples bilong ol long narapela sait bilong Wara Ramu na longpela kanu ya i kisim ol i go. **Poto: Mathew Yakai**



DOK I KEN PILAI SOKA:

I no ol mangki tasol i ken pilai soka, dog tu i ken. Poto ya i soim liklik mangki Tyler i pilai soka wantaim gutpela pren bilong em, Spikey, em wanpela dog. Tupela i save pilai gut tru long bikpela eria bilong ol ausait long haus long Tabubil. Tasol nau Tyler i lusim Tabubil na gutpela pren Spikey, we i stap nau wantaim narapela liklik poro bilong em, Buoi. Poto i soim Spikey i holim bal i stap. **Poto: Veronica Hatutasi**



LEDABEK TRAUSEL: Wanpela projek bilong sevim ol ledabek trausel long Madang i laik putim lebol o mak long dispela trausel. Ol ledabek em ol bikpela trausel stret long wol, tasol pipel i save kilim na kaikaim ol, ol i wok long pinis. Olsem na wanpela man i gat bikpela intres long sevim ol dispela trausel, Wenceslaus Magun i gat projek long helpim sevim ol. **Poto: Wenceslaus Magun**



SOLWARA KARIM: Klaimet senis we solwara i go antap na karim graun na ol ples i kamap long ples klia long Sohano Ailan long Bogenvil, olsem piksa ya i soim. Ples bilong hangamapim ol klos na bokis bilong lukautim pik em solwara i karamapim pinis. **Poto: Veronica Hatutasi**

Oi famili i ken raitim buk



Frieda Sila Kana i raitim

NUPELA kain stori kamap long Papua Niugini we wanpela famili, papa na ol pikinini i kamap ol raitim o 'authors' long Tok Inglis.

PNG'S First Family of Authors Sif Author, John Yareki i bilip na i tok olsem olgeta man na meri na skul pikinini i ken raitim wanpela buk bikos olgeta man i wankain.

Mista Yareki mekim dispela toktok long taim em wantaim ol pikinini bilong em i go long Bavaroko Praimeri skul long las wik Fonde na soim ol buk we ol yet, famili i raitim bilong makim selebresen bilong Nesenel Buk Wik.

Mista Yareki tok, pikinini husat i save long Tok Inglis na pikinini husat i no save long Tok Inglis em tupela wantaim bai inap long raitim wanpela stori buk sapos ol i kam long skul bilong em na ol pikinini bilong em.

Wanpela pikinini bilong em, Eddie Yareki husat i bin 6-pela yia tasol na em i stat long raitim namba wan buk bilong em. Em i bin stap long gret 1 long Carr Memorial Skul long Pot Mosbi long dispela buk bilong em, "The Emperor of the Islands."

Yangpela Eddie i tok, long wanem as em i bin raitim dispela buk bikos long narakain samting em i lukim long taim em i bin go long ples bilong papa bilong em long Dobu, Milen Bei Provins long taim em i liklik mangi. Em i kirapim buk bilong em wantaim stori bilong em i pulim wanpela traipela pis, ol i kolim ret empera.

"Mi olsem wanpela pikinini long siti na taim mi go long ol longwe ples mi lukim ol nupela samting tru long hap ples we mi no save long en. Dispela stori em bilong mi bin pulim wanpela bikpela pis, ret empera," Eddie Yareki i tok.

Em i stori long ol boi sumatin bilong gret 4 Bavaroko, olsem pis i bin hevi stret na klostu i pulim em i go ausait long kanu tasol papa bilong em i holim em bek. Dispela stori bilong em i mekim bel bilong planti mangi kirap long raitim stori buk tu.

Wanpela bilong ol dispela pikinini em Tyrone Sheekiot husat i bilong Dob utu. Em i stap long gret 4 tasol nau em tu i laik kamap wanpela raita bilong buk. Tasol long dispela de em i lukluk tasol bikos em i no gat mani.

Mista Yareki tok, ol i save

Helen (putim brown T-siot) i sanap wantaim ol sumatin meri bilong gret 8 na gret 4 long Bavaroko Praimeri Skul.



salim ol buk long ol haus dua na tu holim ol miting semina long ol nait, long ol wan wan haus bilong ol lain husat i gat bikpela laik long kamap rait bilong buk na tu long ol hotel. Long dispela hap bilong trening nau ol i save salim ol dispela buk. Kos bilong buk em i save karamapim trening bilong husat man o meri o pikinini i laik lainim we bilong raitim buk.

Ol buk bilong dispela famili ogenaisesen em ol i no salim long buk sop, no gat ol i salim olgeta 9-pela buk long husat i laik baim na lainim long raitim buk. Em i kos K1,000.00.

PNG's First Family of Authors i bin go long Bavaroko skul long kamapim sampela awenes namel long ol sumatin long ol i ken tokim ol papamama bilong ol olsem ol i laikim kamap raita bilong buk. Em nau bai ol i ken rejista wantaim ol na kamap sumatin bilong raitim buk.

"Ol bai raitim buk bilong salim na mekim mani bilong ol yet. Ol pikinini na ol papamama i mas save olsem i no gat wanpela samting em i fri," Mista Yareki tok.

Ol i no save salim buk wan wan tasol ol i save salim olgeta 9-pela wantaim na ol dispela buk i save toktok long olgeta kain samting bilong ol pikinini bai laikim i go long we bilong raitim ol polisi tu.

Bavaroko Praimeri skul i bin singautim tu ABC buksop bilong Sewende Edventis long kamap long skul na salim ol buk long hap prais i go long ol sumatin, tisa na papamama long makim nesenel buk wik.

Carmel-lisa Gitawa Wagi bilong Edventis Buksop i helpim ol sumatin long lukim na baim buk.



John Yareki, Sif Author bilong PNG'S First Family of Authors.



Mis Helen Yareki, wanpela raita bilong buk i sindaun na lukluk long ol sumatin.



Ol foto: Frieda Sila Kana

Stori bilong tumbuna



Man i gat het tasol

Long taim bipo tru i gat wanpela raunwara na long dispela raunwara man i gat het i stap.

Klostu long raunwara i gat viles i stap. Long apinun ol pipel i tok, long moningtaim bai ol i go painim abus long dispela raunwara.

Taim moning i kam ol pipel i go na ol i painim planti pis moa.

Long apinun wanpela man tasol i kam na i lukautim abus i stap.

Nau man i gat het tasol i hangre tu na em tu i go long raunwara na painim abus.

Het i lukim bol bilong man ya i painim abus long raunwara, na em i ting i gutpela abus bilong em, nan em i kaikai. Tasol man i pilim pen na em i kirap tok, yu mas lusim bol bilong mi ya. Het i tok, mi no ken lusim. Em i kaikai bilong mi. Man i tok yu lusim bol bilong mi bai mi givim yu banana. Man ya i kolim olkain kaikai long het, tasol het i tok, mi no save kaikai.

Nau man i kolim kapiak,

na het i tok em i kaikai tru bilong mi. Man i tok orait yu lusim mi na mitupela i go painim kapiak. Het i tok mitupela i go kamap long kapiak, orait bai mi lusim yu. Tupela i go kamap long kapiak, het i tok, mitupela i goap long kapiak orait, taim yu tromoi kapiak i kamdaun bai mi kamdaun na kisim kapiak. Man i goap long kapiak na het i hangamap long bol bilong em yet. Man i kisim wanpela kapiak na em i tromoi i kamdaun. Nau het i lus i go daun kisim kapiak. Het i tok yu mas tromoim wanpela moa. Nau man ya i tromoim wanpela i go longwe moa. Nau het i go kisim dispela kapiak, man i kamdaun kwiktai tru na ranawe i go long ples. Taim het i kam bek na lukim man ya i ranawe pinis. Het i kisim tupela kapiak na ranawe i go long raunwara long ples bilong em.

**Emil Simangu,
Brandi Haikul
Wewak.**

TOKSAVE:

WANTOK i askim ol gutpela rida bilong em long salim ol tumbuna stori i kam na bai mipela i putim long niuspepa. Sapos stori bilong yu i gutpela na mipela i putim long niuspepa, bai yu winim **K50** we mipela bai salim i go long akaun bilong yu, o salim mobail yunit inap long **K50** i kam long fon bilong yu. Salim nem, edres na mobail namba bilong yu wantaim stori i kam long dispela edres: *Stori Tumbuna, Wantok Niuspepa, C/Word Publishing Company, P O Box 1982, BORO KO, NCD, PNG* o email edres: editorial@wantok.com.pg
Telepon namba: 3252500.

Tenkyu

Raun wantaim Wantok kru ...

Bikpela senis long PNG musik

Nicky Bernard i raitim

PAPUA Niugini bai amamasim 40 yia bilong Independens long Septemba 16, 2015.

Olgeta provins long kantri bai amamasim dispela Independens de long wanem PNG i sanap em yet long 40 yia, olgeta. Insait long 40 yia planti senis i wok long kamap long wan wan provins na dispela bai soim amamas bilong em bai narapela samting olgeta.

Insait long Musik bisnis, bikpela senis tru i kamap. Bipo yumi save harim string ben tasol na no gat pawa ben. Ol lokal redio stesen i save go long ol ples na painim ol string ben na rekotim, na bihain pilaim long redio na yumi save harim.

Tasol nau olgeta musik bilong PNG i senis. Planti pawa ben na ol solo manmeri i yusim masin musik long kamapim singsing bilong ol, na masin bilong rekot i save rekotim ol. Olsem na taim yumi harim long ol redio stesen bai yumi ting nek bilong em i swit na nais.

I gat planti ol pawa ben long PNG i stat wantaim string ben, we ol save tok "5 Ki". Dispela ol ben i mekim we bilong string ben i kam na nem bilong ol i kam bikpela taim ol i go long Pawa Ben.

Kain ben olsem Molaks ben bilong Rabaul, Helages ben, Paramana Strangers na Gwadus ben bilong Sentral na i gat planti moa. Dispela ol ben i stat wantaim 5 ki string ben na taim yia bilong yumi PNG i wok long senis ol dispela ben tu i wok long senis i kam inap ol kamap long pawa ben.

Wanpela ben we musik bilong em i wok strong yet long kantri em Quakes Ben. Dispela ben em top musik man bilong yumi long PNG na Pasifik, Patti Pots Doi, i bin go pas long em. Dispela ben i bin rekotim namba wan albam bilong ol wantaim miks musik. Musik bilong em string ben o 5 Ki wantaim pawa ben. Dispela albam bilong ol bin hot stret taim em kam aut.

Gwadus ben i no moa rekotim ol albam, tasol ol i wok long pilai laip long sampela bikpela seremoni

na sampela bikpela klap long Pot Mosbi. Wankain tu ol Paramana na Helgas.

Molaks ben ben bilong Rabaul i tanim nem i go long Painim Wok ben na dispela ben tu i stap yet na ol bai mekim raun bilong ol long olgeta provins bipo ol raunim nem bilong ol long musik indastri long PNG.

Nau planti bilong ol yangpela nau i go stret long pawa ben we musik bilong i kam wantaim ilektronik samting na planti musik tu i yusim kompyuta long mekim musik bilong ol. Na i no olsem bipo ol bai bung olsem ben na pilai laip na bihain go rekot long kamapim albam bilong ol, nogat, wan wan manmeri gat singsing bilong em na raitim 6 o 8-pela singsing em bai go tasol long rekot na masin yet bai kamapim musik bilong em.

Dispela em ol nupela kain stail nau planti bilong ol yangpela musik manmeri bilong yumi long PNG i wok long lainim na mekim nem bilong ol long musik indastri bilong PNG.



Ol foto: Nicky Bernard



Ol nupela Gwadu Ben memba bilong Pot Mosbi. Ol tu bai amamasim 50 yia bilong Gwadus ben long Oktoba dispela yia. Bill Aisi em wanpela bilong olupela memba bilong Gwadus ben na em save pilai dram taim em yangpela mangi yet i kam inap nau.

Em nau! Ol pikinini i ken painim rot i go long ples wantaim Wantok kru...



Kanage long Lumi

KANAGE em i bilong Lumi. Em i save stap long ples tasol. Bagaros i save wok hat stret long lain kakau bilong em i stap. Long taim bilong skelim kakau, boi ros i save kisim olsem K100.00 o K200.00, sapos kakau prais i gutpela. Mani em i save kisim long salim kakau em i save bungim na sevim i stap.

Wanpela taim, Kanage i wokabaut na kalapim Sumoro maunten na bihainim Wara Yalinge i kam kamap long Poro. Em i kalap long PMV long Yamari na spinim I go long Aitape taun.

Tingim, em fes taim bilong em long kam long taun. Maus bilong em i op nogut tru na ai bilong em i laik kam aut.

Em i wokabaut i go na em i lukim wanpela PMV bas na isi tasol em i tok, "Oh Jisas! Mama, haus ya i gat wil na ol man insait". Em i raun liklik i go na em lukim solwara.

Yu save, mangi bilong bus maunten na em i save tasol long ol liklik wara.

Em lukim solwara na tok, "Mama Maria! Wara ya bikpela tru ya. Em i winim liklik wara mi save waswas long em."

Johnson Mamu Aitape

Point ov Oda

KANAGE em i wanpela bisnis man na tu, em i memba bilong Palamen Haus makim distrikt em i kam long em.

Wanpela kot i wok long kamap long Mosbi Nesenel Kot namel long bisnis bilong em na wanpela bignem benk insait long PNG.

Sem wik taim kot i wok long kamap, Palamen siting tu i kamap.

Kanage i stap long Palamen long narapela tupela de na namba tri de, em i kamap long kot haus.

Em i sindaun arere long loya bilong em na harim ol toktok pait i wok long kamap namel long tupela loya. Em long loya i makim bisnis bilong em na narapela loya i makim benk.

Tok pait i go bikpela tru. Loya bilong benk i toktok i go na toktok bilong em i no go gut long yau bilong Minista Kanage.




Toktok bilong loya i mekim na bel bilong Minista Kanage i hat olgeta.

Boi, Kanage i pilim no gut na no gat toksave long loya bilong em. Em pairapim strong desk long han bilong em.

"BANG!!!" Tebol i pairap wantaim na Kanage isanap singaut long Jas."

Point ov oda! Point ov Oda, Your Hona!" Jas i tokim loya long toksave long Klaien bilong em olsem dispela em i no Palamen Haus, em Kot Haus ya!


Side Kona Joe MB Hohola



- Ol wod lista hia:**
- ATORITI
 - ASUA
 - BINATANG
 - BIRUA
 - BUNGIM
 - DRINGIM
 - DRIP
 - FUTBAL
 - GUTWOK
 - HUKIM
 - HOMBRU
 - ISIPASIN
 - INFOMESEN
 - KUNDU
 - KUSKUS
 - LUSIM
 - LUKLUK
 - MOTO
 - MISTA
 - NOGUTIM
 - OVASIS
 - POSISEN
 - RUREL
 - SLOIM
 - TRITMEN

M O E P V C A O S A N S M E U Q A S E F
 A I O S R E F I E A N J D X I E U A P E
 C F R M N O D Q P Q A C O P D R P V M G
 E Q M E R D A I R E N Q A D I E S G E I
 P R P V T D R I F F F E N S Q C B D L L
 M Z F N B A I G L E T T O L U A D O N U
 P D E D T M H M S E E I O D R A P E E L
 T T O P L B B F K B D D V S P R A X P Q
 E T E C E A I Y H O A R A L F P T A C O
 A K F V D N V H G A R I S P U N O L F E
 F T L N O L K Y V A K N I O E S R A A S
 D Z S F H T U S E O F G S S F M I S T A
 Q A C F E U S K W O F I E I I A T M G Z
 V D X G V N K T L K S M B S I P I N U I
 K H W N D O U I W U O P M E R F A E I F
 E O U L R G S Y M F K E O N P T N S I K
 A M O M I U P L N S F U T B A L N L I U
 B B O C P T R I T M E N O N C D R O Y N
 R R L X B I P E M E N N I L F E R I F D
 B U N G I M Q O L Y V B I R U A A M R U

Ansa bilong Wod Pilai isu 2133





TOK PISIN NEWS

from Radio Australia

radioaustralia.net.au

Harim TOK PISIN long
Radio Australia
101.9FM
Port Moresby

Tok Pisin Service	
6am - 7am	6080; 7240(KHZ)
7pm - 9pm	5995; 6020; 9710; 1280(KHZ)



Ol gan wankain olsem ol gan em PNG i laik rausim long kantri. Ol foto: ABC



Ol pilai na wina bilong Solomon Ailan long namba 15 Pasifik Gems long Mosbi.

Nupela sevis bilong Namba Wan Super

OL i yusim nupela teknoloji long helpim ol memba long was long mani bilong ol.

Namba Wan Super Limited long Papua Niugini i kamapim pinis nupela sistem bilong ol memba bilong en, long ol i ken was long pe bilong ol i kam long ol teks long mobail fon bilong ol.

Sapos memba i putim eplikesen long kisim dinau em inap lukim eplikesen bilong em i stap pinis na redi long ol i givim tok orait long en.

Na ol memba tu i ken kisim tok save long sekap long brens long eria bilong ol sapos ol i kamap pinis long akaun bilong ol o nogat.

Benjamin David em i senia Pablik Rilesen opisa long Marketing Dipartmen bilong Namba Wan Super na i tokim ABC Nius long dispela nupela sevis.

National Gallery bilong Australia i soim ol Sepik kaving

NATIONAL Gallery bilong Australia long Canberra nau i wok long soim ol kaving na art wok bilong Sepik.

Ol i bin opim dispela so long dispel wik na em i wanpela wokbung wantaim Papua Niugini Nesenel Museum na Art Gallery na National Gallery bilong Australia.

Ol i gat samting olsem 85 ol Art wok bilong Sepik na planti long ol dispela art wok em ol i no bin lukim bipo.

Sampela long ol dispela art wok i stap long Australia

longpela taim pinis, na ol i salim sampla i go long PNG bilong makim 40 yia independens na bihain bai ol i kam bek long Australia.

PNG National Museum na Art Gallery tu i salim 5-pela Artwok bilong Sepik em ol i soim nau long Canberra.

Ol i kolim dispela so "Myth and Magic: Art of the Sepik River"

Francis Bafmatuk bilong PNG National Museum na Art Gallery i stap nau long Canberra long helpim dispela so.

Straik bilong ol buas draiva i pinis

OL bas draiva long Solomon Ailan husat i bin straik long dispela wik i go bek long wok bilong ol nau.

ABC Nius ripot i tok dispela stop wok bilong ol bas draiva i bin kamap long wanem ol draiva i bin kros long wei ol papa bilong ol, we planti bilong ol i bilong Esia, i no save bihainim stret ol rot em ol bus i mas mekim ran bilong ol.

Ol bas draiva i bin tok ol Esia bas bisnis lain i bin tokim ol draiva bilong ol olsem ol i mas yusim ol sotpela wei long mekim ran bilong ol, na tu, i gat mak bilong mani ol draiva i mas kamapim insait long wanpela de.

Honiara Siti Kaunsil na Ministri bilong Komes i save lukautim ran bilong ol bas sevis long Honiara.

Deputi Taun Klek long Honiara Siti Kaunsil Fred Jones i tokim Radio Australia olsem dispela kain pasin bilong bihainim ol sotpela rot em i no stret.

PNG Difens komanda bipo i wanbel long rausim ol gan

OLPELA Mesa Jeneral bilong PNG Difens Fos, Jerry Singirok, i tok em i amamas na sapotim tingting bilong gavman long rausim olgeta gan long kantri.

Praim Minista, Peter O'Neill, i tok kantri i no nidim gan long lukautim lo na oda olsem na em i tok gavman bai bihainim ol toktok bilong wanpela ripot bilong rausim gan.

Papua Niugini i gat nem nogut long ol hevi bilong gan na hevi bilong lo na oda we sampela pipel i save yusim gan long kilim ol narapela pipel o ol i save yusim gan long stilim ol samting.

Long sampela hap long Hailans ol pipel nau i save yusim gan long ol traibel pait we bipo ol i save yusim spia na banara.

Mista Singirok i bin siaman bilong wanpela wok painimaut long gan na em i bin givim ripot long 2005 long rausim gan long komyuniti.

Nupela PNG Klaimet Lo i gutpela

GAVANA bilong Wes Nu Briten provins Sasindran Muthuwel i tok em i amamas tru long palaman i bin tok orait long dispela Klaimet Manesmen Bilong 2015.

Ol Pasifik kantri olsem Kiribati na PNG nau i gat wari long klaimet senis.

Wes Nu Briten Gavana Sasindran Muthuwel i toktok wantaim ABC long dispela samting.

Em i tok em i amamas

long wanem planti kantri long rijon na tu long ples bilong en i wok long bungim nau ol bikipela hevi em klaimet senis i wok long kamapim.

Gavana Muthuwel i tok planti ples klostu long Hoskins nau solwara i bagarapim ol pinis.

Papua Niugini tu i gat nem nau olsem em i gat ol namba wan klaimet refuji we ol pipel bilong Caterets long Atonomus Bogenvi i lusim ailan bilong ol na go long bikiples Bogenvil.

Mista Muthuwel i tok dispela nupela lo bai helpim tru ol pipel long was na mekim ol wok bilong helpim ol pipel taim solwara i wok long bagarapim ol ples bilong ol.

Solomon Ailan i mas strongim na apim turis bisnis

I gat toktok olsem Solomon Ailan i mas stretim gut pastaim ol ples balus, ol ples bilong slip o hotel sapos em i laik strongim na apim wok bilong turis bisnis long kantri.

Michael Tokuru, papa bilong Green turisim long Solomon Ailan i tokim ABC Nius olsem Solomon Ailan i mas stretim gut ples balus na ol hotel sapos em i laik strongim bisnis bilong bringim ol turis i go long kantri.

Michael Tokuru husat i bin bos bipo bilong Solomon Islands Visitors Bureau i mekim dispela toktok bihain long Minista bilong Turisim na Kulsa, Bartholomew Parapolo i tokaut olsem kantri i mas strongim wok turis long wanem em bai bringim planti mani long helpim ikonomi bilong kantri.

Mista Parapolo i tok turis bisnis em i wanpela kain wok we planti pipel i ken go insait long en.

Em i tok tu olsem Solomon Ailan i mas lukluk long ol narapela kantri long Pasifik rijon, we turis bisnis i wok long pulim planti mani.

Ol Manam pipel i bungim hevi yet

Ol pipel i hangre yet na sot long gutpela wara bilong dring bihain long Manam maunten paia i pairap long wik i go pinis.

ABC Nius ripot i tok samting olsem 5 tausen pipel long Manam ailan i wok long wet yet long kisim sampela helpim bihain long Manam i bin pairap long wik i go pinis.

Dairketa bilong provinsal disasta opis long Madang, Rudolf Mongalee i tok ol i no gat mani long baim ol samting na bringim hariap i go long ol dispela pipel.

Dispela maunten paia i bin bagarapim planti gaden kaikai, ol haus bilong ol pipel, na tu em i mekim Edukesen Dipatman i pasim ol skul long ailan.

Mista Mongalee i tok tu olsem em i askim pinis provinsal gavman na Nesenel Disasta Opis long Pot Mosbi, tasol em i no harim bekim bilong ol yet.

Tim Solomon bos long Pasifik Gems i no amamas long ol pipel

SOLOMON Ailan Sif de Misin Ronald Bei Talasasa i tok ol pipel i mas helpim spot long kamap strong na no ken

krosim ol pilai tumas.

Namba 15 Pasifik Gems long Papua Niugini i bin pinis klostu tripela wik i go pinis.

Maski long gutpela pilai bilong ol etlit bilong Solomon Ailan, we ol i bin winim planti medal, sampela pipel long kantri long autim kros bilong ol i go long ol etlit na ol opisal.

Ronald Bei Talasasa i tok dispela ol kain kros pipel i putim long sosel media i no helpim wok bilong ol opisal long traimekim ol etlit i pilai gut long spot bilong ol.

PNG Goroka taun i gat belhevi long gavman

Dispela kros i kamap long taim bilong givim wok bilong edministreta i go long nupela man.

Goroka biktaun bilong Isten Hailans i bin bungim hevi bihain long ol sapota bilong olpela edministreta i rausim pepa i tok save long nupela ekting apoinmen bilong nupela edministreta.

ABC Nius ripot i tok ol pipel i bin kros long wanem Provinsal gavman i makim wanpela wokman bilong PNG Medical Research Institute, Samson Akunai olsem nupela ekting Provinsal Edministreta bilong Isten Hailans Provins.

Goroka taun i orait tasol ol pipel i wok long bung yet i stap na ol polis mobail skwat tu i stap pinis long was long dispela hevi.

NBC nius long Goroka i tokim Radio Australia dispela hevi bilong Isten Hailans Provinsal Edministreta i no bilong nau.

Ol sumatin i selebretim Intanesenel Yut De

Esther Bralyn Wani i raitim

OL sumatin long Hagara Pramereri Skul na Tokarara Pramereri Skul long Nesenel Kapitot Distrik i bung wantaim Trensperensi Intanesenel (TIPNG) na Nesenel Palamen long luksave long Intanesenel Yut De wantaim het tok bilong dispela yia, 'Yut Sivik Engesmen'.

Ol sumatin long Tokarara Pramereri skul i presentim ol kain kain hevi i kamap long ol yut long kantri na Hagara Pramereri i mekim wanpela liklik drama long soim piksa long wanem as ol sumatin i no save pinisim skul gut.

Ol sampela hevi ol

sumatin i tokaut em no gat inap wok bilong ol yut long mekim taim ol i no pinisim skul, ol laik lukim gavman long kamapim planti teknikwl skul bilong ol sumatin i no inap go het long Gret 9, mekim ol rot bai ol yut i no gat skul ken salim ol prodak bilong ol na ol nupela hevi olsem ol yut i pulap long strit bai ken gat wanpela haus bilong ol yut long slip na kaikai gut.

Long wankain taim, Siaman bilong TIPNG, Lawrence Stevens, i tok olsem sampela taim em i gutpela gavman i ken harim toktok bilong ol pipel long wanem em i wok bilong ol

long harim hevi bilong ol pipel.

Opis bilong Spika tu i tokaut long wankain taim long kisim ol aplikesen bilong 2105 Mok Yut Palamen Sindaun.

Dispela em bilong mekim ol yangpela gat intres na mekim awenes long wok bilong ol nesenel palamen na soim na divelopim strong bilong ol yut long kamap ol man na meri bilong mekim disisen.

Dispela em driman bilong Spika bilong palamen, Theodore Zurenuoc bai ol pablik i ken gat save long palamen na ol pablik infomesen o toktok.



Ol Gret 8 sumatin long Hagara Pramereri skul i mekim sotpela pilai long soim olsem ol sumatin i wok long dring bia na smukim spak brus na ol i no wok skul gut.

Skul kisim helpim long BSP komyuniti projek

PILAI Spots em i gat bikpela wei bilong strongim tingting bilong ol pikinini long stap helti na strong, na BSP em i save helpim dispela kain wei wantaim ol Komyuniti Projek ol i save wokim long olgeta hap we ol i gat benk brens.

Wewak taun long Is Sepik na Wabag long Enga provins i bin lukim dispela kain helpim taim BSP Wabag na Wewak brens i bringim tupela projek i go long ol skul long dispela tupela taun.

Long Wewak, BSP i senisim wanpela basketbal na volibal kot long Bisop Leo Sekenderi Skul wantaim nupela pen, nupela net bilong hup, ol basketbal bal na ol volibal bal wantaim ol net.

Skul Prinsipal Steven Bueng i amamas tru long BSP long givim dispela projek na em i tok olsem dispela fasiliti bai helpim ol skul na komyuniti i stap klostu.

"Tenkyu BSP long hatwok bilong yumpela long stretim ol dispela kot, nau mipela i


gat bilong ol sumatin na ol lokal komyuniti long yusim," Mist Bueng i tok.

BSP Wabag i lukim senisim long wanpela bikpela kot long Sare Pramereri Skul we i save holim volibal, netbal na tenis. Dispela skul tu i kisim ol wankain samting bilong spot.

Ol wokman na meri long tupela brens bilong BSP i bin yusim taim bilong ol yet long wiken long helpim long stretim ol dispela ples bilong pilai.



BSP Wewak Komyuniti Projek Menesa, Margaret Tiona i givim ol bal i go long Prinsipal bilong Bisop Leo Sekenderi, Steven Bueng.



Siaman bilong Trensperensi Intanesenel (TIPNG), Lawrence Stevens i toktok long Intanesenel Yut De.

Gavman kamapim NPME long strongim pipel

Paul Zuvani i raitim

GAVMAN i wok hat long skulim ol pipel long mensmen save na long strongim sindaun bilong ol. Na em bai mekim dispela long Nesenel Plantesen Menesmen Ejensi (NPME) program.

Praim Minista Peter O'Neill i tok kain program i bin stap long 1970s o 80s tasol i pinis na nau gavman bilong em i laik statim gen.

Wantaim long dispela tu, em i kamapim gen Stret Pasin Stua na narapela ol egrikalsa projek em i kamapim long Sepik Pleins long Is Sepik, Baiyer Veli long Westen Hailans and Sentral provins.

Dispela Sepik Pleins egrikalsa projek inap kisim

samting olsem 5000 i go long 6000 manmeri long painim wok.

Mista O'Neill i mekim dispela tok bihain long wanpela askim sapos gavman i gat plen long strongim egrikalsa sekta bihain long bagarap bilong spesel egrikalsa bisnis lis (SABL) program aninit long Nesenel Egrikalsa Plen (NAP).

Mista O'Neill i tok em i no amamas long pasin we mani bilong SABL i paul.

Na em i no laik bai wankain pasin i kamap long NPME program o ol rot we gavman i kamapim nau long strongim sindaun bilong ol pipel.

Em i tok gavman bilong bipo i bin givim mani mak olsem K400 milien tasol dis-

pela mani em manmeri i kisim dinau long em i no kamapim ol wok ol i tok long mekim na olsem bikpela mani i lus nating.

Tasol Mista O'Neill i tok maski long dispela gavman i redim pinis K100 milien long SPME tasol i no inap larim dispela mani i go aut inap long olgeta rot i stret.

Dispela em long lukim i gat graun i stap bilong mekim ol wok.

Em i tok papagraun i mas rejista graun bilong ol na larim wok i kamap long graun bilong ol.

Narapela samting em long gavman bai laik mekim em long opim maket long lukim manmeri i salim samting bilong ol olsem gaden kaikai i go long ol narapela kantri na

olsem em bai lukluk long givim tokorait long askim balus kampani bilong ol narapela kantri kam insait long Papua Niugini.

Em i tok no gat planti balus kampani i ranim balus bilong ol i go kam long PNG na olsem pe bilong salim ol kago o kisim manmeri i go kam i dia tumas.

Em i tok balus kampani bilong Filipins i ran go kam pinis long Pot Mosbi na em bai askim balus kampani bilong Indonesia long mekim wankain.

Moa long dispela em i tok Esia maket i gutpela long wanem lo bilong kwarantn i no strong tumas olsem long Australia na Nu Silan na em i isi long salim samting long maket long Esia.

Wok painim long MH17 Malesia balus long Ukraine



OL intanesenel na Holan investigeta long Malesia MH17 balus ol i bin sutim long Is Ukraine, klostu long Rasia long mun Julai las yia na 298 pipel, planti i bilong kantri Holan i bin dai long en, i tok misail o bom i bin daunim balus i bilong Rasia.

Ol i painim hap wil na ol hap pipia we i soim olsem liklik bom ol i bin sutim dispela

balus long en long Is Ukraine em ol i wokim long Buk misail long Rasia.

Ol memba bilong investigesen tim i kam long Holan, Ukraine, Malaysia, Australia, Britain, Amerika na Rasia nau i bung long Hague long toktok long draf ripot long traım painim wanem samting i bin mekim balus i pundaun.

Reuters/AFP

Wanpela ensin bilong MH17 Malesia Elain balus.

Poto: ABC (Reuters/AFP)

Ol haphap pipia i bilong MH370 Malesia balus i bin lus long Mas 2014



PRAIM Minista bilong Malesia, Najib Razak, i tok em i tru ol hap pipia bilong balus we ol i painim La Reunion Ailan i hap bilong balus bilong Malesia, MH370 flait.

Dispela balus i bin karim klostu 300 pasindia na i lus nating long mun Mas las yia.

"Tude em i 515 de taim balus i bin lus na mi tokaut long dispela wantaim bikpela wari na hevi. Tasol ol intane-

senel saveman na investigeta i tokaut olsem ol pipia na ol haphap samting bilong balus ol i painim long La Reunion Ailan long sauten Indian Osen i bilong MH370 Malesia Elain balus.

Ol wok painim i wok long go het yet bikos pipel i laik save watpo na wanem as tru dispela balus i go pundaun long dispela hap we i no stap long rot balus i wok long go long en.

TINGIM MH 370 BIRUA: Malesia bai oltaim tingim na luksave long ol lain husat i bin lus long MH370 balus ran.

Poto: ABC

Japan i selebretim 70 krismas anivesari bilong Hiroshima atomik bom birua



NAMBA 70 HIROSHIMA ATOMIK BOM BIRUA: Ol balus pisin i plai antap long Pis Memoriel Pak long Hiroshima, Japan we ol i bin holim seremoni long makim namba 70 anivesari long Amerika i bin tromoi atomik o liklik strongpela bom long Hiroshima long yia 1945 na Wol Woa 2 i bin pinis. Ol lain i bin stop isi long sotpela taim na tingim pipel i bin dai.

Poto: ABC

Japan i selebretim 70 krismas anivesari bilong Hiroshima atomik bom birua

Praim Minista bilong Japan, Shinzo Abe na ol foren foren deleget i bin stap long dispela memoriel selebresen.

Long Ogas 06, 1945, supa boma balus bilong Amerika Enola Gray i bin tromoi "Liklik Boi" em nem ol i bin yusim long 10,000-paun hevi yuranium 235 bom na pinisim Wol Woa 2. Bom pairap ya i bin kamap long 600 mita antap long Hiroshima siti na

tuhat bilong em i bin nap long 4,000 digris Celsius mak na kamapim bagarap long 4.5km redius o eria we i bin lukim bikpela paia i kamap.

Japan i luksave olsem 253,008 pipel olgeta i bin dai long posin bilong dispela liklik atomik bom.

Long wankain taim, moa long 70,000 pipel i bin dai long bris (port) siti bilong Nagasaki taim Amerika i bin tromoi narapela atomik bom long hap long Ogas 09, 1945.

Nainpela intanesenel heka o lain i hait na go insait long ol kompyuta na stilim ol infomesen samting i kisim sas

Amerika i sasim 9-pela komyuta heka i stap insait long wanpela intanesenel tred heka grup na wokim \$US100 milien winmani, ol opisal bilong Amerika i ripotim.

US Jastis Dipatmen i sasim dispela 9-pela pipel long kriminel plen na wok ol i mekim long kisim moa long \$US30 milien long iligel tred long infomesen ol

i kisim we i no bihainim lo.

Ripot i tok tupela kompyuta heka long Ukraine i bin go insait long kompyuta system bilong

Marketwired, em PR na Bisnis Wire, i save tilim ol pres rilis o nius long 4-pela bikpela pablisiti tred kampani.

Ripot i tok ol heka ya long Ukraine i bin stilim samting olsem 150,000 pres

Ol i bin stopim Transfield Services em kampani bilong Australia i save ranim Manus Ailan Asailam Sika Ditensen senta long no ken tilim ol soklet ol i kolim long Freedom miusli ba na ol arapela kaikai na ol samting wantaim

Ol nem i gat "Freedom" long ol long senta. Dispela em bikos nem "Freedom" i no gut wantaim ol pipel husat i stap long kain ditensen senta olsem we ol i pilim olsem ol i no fri.

Ol ripot ol i autim tasol i tok

Imigresen na Boda Proteksen Dipatmen bilong Australia i bin stopim kampani ya long no ken salim ol soklet na ol narapela kaikai samting wantaim nem, "Freedom".

Ol ripoit i tok dispela kain nius inap bagarapim sans bilong Misis Clinton long sanap long resis bilong presiden.

Painim tupela top sikret email long praivet email bilong Hillary Clinton

HILLARY Clinton, pastaim Seketeri bilong Stet long Amerika na meri bilong wanpela taim Presiden bilong Amerika, Bill Clinton, husat nau i laik ran long nesanel ileksen bilong Amerika long resis bilong presiden i edvaisim loya bilong em long givim praivet email seva i go

long Jastis Dipatmen long wok painim nau i kamap.

Dispela em long ol tok sut long Misis Clinton olsem em i bin yusim praivet email akaun bilong em long putim tupela "top sikret" email taim em i bin holim wok olsem Seketeri bilong Stet long Amerika.

Ol toktok na wok painim long dispela i go het yet nau, Intelijens komyuniti inspekta jenerel i tok.

Ol ripoit i tok dispela kain nius inap bagarapim sans bilong Misis Clinton long sanap long resis bilong presiden.

rilis na ol araperla bisnis data stat yet long mun Februeri 2010 i kam inap nau.

Dipatmen bilong Atoni Jenerel i tok 7-pela difenden na ol narapela moa bilong Ukraine na ol stet bilong Georgia, Pennsylvania na New York long Amerika i wok wantaim ol 9-pela heka ol i kisim sas pinis.

Gavman i laik kisim pawa i go long ol rural eria

...Wantaim pawa i kam long san



Ol solar panel long Tonga. Poto na stori: ABC

GAVANA bilong Wes Nu Britain provins, Sasindran Muthuvel i tok ol i save olsem mani bilong baim ol sola panel i bikpla tumas, tasol gavman i wok long lukluk long ol narapela rot bilong helpim dispela projek long go het.

Wes Nu Briten i wankain olsem olgeta provins long kantri i save gat gutpela san. Ol

i ken yusim pawa bilong san ol i kolim long sola pawa long kamapim sola ilektrisiti.

Long wankain taim tu, provins i gat ol bikpela wara em ol i ken yusim tu long kamapim pawa.

Em i mekim dispela toktok taim gavman i statim pinis ol wok bilong kamapim sola ilektrifikesen program long provins.

Westen Hailans kalsereel festival



Ol pipel i sanap wantaim bilas long Man Hagen so. Poto na stori: ABC

NEM kalsa festival o so bilong Dei Distrik long Westen Hailans provins i nau i wok long go het long Keta Viles skul.

Sif Eksekutyutiv Opisa o CEO bilong festival, James Paraka, i tok planti long ol kain kain kalsa grup nau i stap long dispela Dei Amb Korr festival we i bin stat long long Tunde na bai pinis long tude.

Mista Paraka i tok festival i soim kalsa na sindaun bilong ol pipel long graun bilong ol.

Em i tok festival i soim tu tingting bilong ol pipel long ol samting long ples na long Dei District we i save groim planti kaikai bilong kantri.

Mista Paraka i tok dispela so i sanap makim ol kalsa o pasin tumbuna bilong ol pipel.

NMSA & na Milen Bei Provins bai kamapim PSSA

NESENEL Maritaim Seft Atoriti (NMSA) nau i wok klostu wantaim Milen Bei Provinsal Gavman long developim wanpela proposal long kolim Sauten Milen Bei Solwara olsem wanpela Sensitiv Eria (PSSA).

Taim Intenesenel Maritaim Ogenaisn (IMO) i makim wanpela PSSA long solwara bilong Milen Bei, em bai namba wan taim stret long Pasifik Rijen ausait long Australia PSSA we Bikpela Barrier Rif na Tores Stret i stap long en, na em bai kamap namba 12 long wol.

Long mekim luksave long dispela samting, Milen Bei Gavana, Titus Philemon na tupela senia NMSA Menesmen tim i bin go stap long wanpela trening woksop long Nadi, Fiji.

Dispela woksop i mekim rot bilong ol lain i makim ol Pasifik Ailan pipel long toktok long

ol rot bilong banisim na lukautim ol hap solwara we intenesenel siping bai i no inap bagarapim. Dispela sab risional woksop long luksave long wanpela hap eria long Pasifik Osen we ol i mas lukautim gut, 'The Identification and Designation of Particularly Sensitive Sea Areas (PSSAs) in the Pacific Ocean' em Seketeriet bilong Pasifik Rijen Envairenmen Program (SPREP) i bin go pas long en wantaim Intenesenel Maritaim Ogenaisn (IMO).

PSSA em i wanpela rot bilong globol wok, we IMO i kamapim long stopim o pinisim olgeta ol kain pasin bilong ol ovasis sip bilong pulim pis i save mekim we ol inap long ol bagarapim ol pis na rif. Em i no olsem ol Marin Protekted Eria we i gat wok bilong lukautim envairenmen long ol kain wok olsem long kisim pis, wanpela PSSA i

save makim tasol ol rot bilong ol ovasis sip bilong pulim pis i save bihainim.

Nau insait long Pasifik rijen i gat 5-pela eria em ol lukim olsem inap long kisim wanpela PSSA. Ol dispela eria i stap long hap solwara bilong Papua Niugini, Cook Ailan, Fiji na Kiribati. Ol i lukluk tu long ol narapela olsem Tonga, Marshall Ailan na Solomon Ailans.

NMSA Jeneral Menesa/CEO, Paul Unas i tok, "Wanpela PSSA bai i lukautim ol samting bilong solwara we inap long bagarap isi na tu long olgeta hap bilong solwara. Sapos PNG i kamapim wanpela PSSA we ol i gat intenesenel luksave, nau ol kostol komyuniti i ken lukim kaikai bilong en long laip bilong ol taim ol i gat gutpela sindaun long wanem gutpela samting ol bai kisim long ol samting bilong solwara."

Nesenel Developmen benk i laik helpim pipel

PNG National Development Bank (PNG NDB) i laik helpim ol el wantem bisnis long kantri.

PNG NDB Investment (NDBI) bilong PNG bai go het long mekim wok blong en long helpim ol pipel husat i laik go insait long ol wok bisnis.

NDBI i hap bilong National Development Bank i bin tok olsem benk i bin gat sampela

hevi long baset bilong em long helpim ol liklik na namerl sais bisnis long yia i kam.

Tasol benk i tok ol i gat mani bilong helpim ol yangpela o ol youth long kirapim ol kain liklik bisnis bilong ol.

Gloria Savua em kodineta ilong dispela bisnis developmen program bilong ol Yut i tok program we em i go pas long en bai go het long wok bilong em long helpim ol yangpela.

NRI i askim Treseri long tok klia

Esther Bralyn Wani i raitim

BIHAIN long Mid-Yia Ikonmik na Fainensel Autluk (MYEFO) ripot we Dipatmen bilong Treseri i putim aut dispela i mekim Nesenel Risets Institut (NRI) long kamap wantaim ol askim long wanem hap LNG mani i stap.

Dairekta bilong NRI, Dokta Charles Yala wantaim Senia Risets Felo na Program Lida Dokta Osborne Ogis Sanida i toktok long wanpela media komprens long NRI.

NRI i tok ol no kisim olgeta data long kamap wantaim wanpela fainel toktok long dispela tupela askim. Long wanem ol i kamap wantaim sampela toktok long painim aut long helpim ol.

Ol i lukluk long namba insait long MYEFO, em i klia olsem bikpela pundaun long reveniu i soim olsem 2015 mani i kam long maining, oil na LNG sekta – wantaim LNG i mekim bikpela mani. Ol lus long reveniu long oil na long Ok Tedi bai daunim prodaksen na liklik komoditi prais.

Tasol NRI i laik save olsem LNG mani i stap we.

Ol i tok total reveniu bilong 2015 long maining na petroleum i soim olsem em K400 milien tasol LNG reveniu i stap we.

Dairekta bilong NRI, Dokta Charles Yala i tok olsem ekspot bilong LNG i mas K14 bilien long 2015, Treseri mas tokaut long wanem mani bai PNG i kisim. Em i tok na tu no gat ol dividen long LNG we gavman i lukautim i stap long MYEFO. NRI i kamap wantaim tupela toktok em olsem, bikpela LNG i no givim bek long PNG o i gat hevi long taim bilong reveniu.

Long dispela NRI i ting hevi i stap long taim bilong reveniu. Bipo, i bin gat planti spending na ol i ting LNG projek bai mekim planti mani. Tasol, ol reveniu i no kam hariap, long wanem ol i no klia. Wantaim dispela, Treseri i painim hat long mani na em i wetim reveniu.

Tupela bikman long NRI i tok taim Treseri i no tok klia long

LNG reveniu long MYEFO, ol i yusim dispela fiskel situesen olsem bikpela samting tasol ol i bilip olsem em i no tru.

NRI i lukim olsem ol dispela hevi bai kamap taim komoditi prais i go daun olsem, gol prais bai go daun liklik tasol bai gat liklik hevi bikos gol main i no save baim takis olsem Ramu Main long nikel; kopa prais bai go daun na Ok Tedi mine bai kisim hevi tasol hevi bilong prais i liklik.

Tasol em bai kamap bikpela hevi long gavman bikos em Stet Owned Entaprais (SOE) taim em i no wok gut. Ol i lukim olsem, Kutubu bai kisim bikpela hevi tasol em i kamap pinis long liklik skel prodaksen na Wol Benk na IMF bai lukim 25 pesen i go daun, tasol NRI i no klia long trupela hevi bilong PNG LNG prais bikos ol no gat ol kontrak arensment.

Long wankain taim, Dokta Yala i tok em i gutpela long givim sans long ol praivet kampani long ranim bisnis na gavman i ken mekim rot bilong ol isi.

Ramu Nico redi long nesanel ER salens



Ramu NiCo tim i trening long kilim dai paia.

WOK REDI long Nesanel Imejensi Salens bai kamap long Madang long Ogas 22 i go inap 24, 2015 na ivents kodineta, Daniel Round i tok salens long dispela yia bai kamap gut stret.

Mista Round i tok 2015 ER salens bai yusim ol risos long Madang taun long PNG Maritaim Koles na Divain Wod Yunivesiti (DWU). Namba wan nikel/kobalt divelopa long PNG, Ramu NiCo Mennesmen (MCC) bai go pas long lukautim dispela salens. Mista Round i tok ol i stat plenim dispela ER salens long las yia, na dispela yia bai i lukim ol ERT tim bilong ol maining na petroleum kam-

pani long PNG i pulim lain i go long Madang long resis namel long ol yet. Ramu NiCo bai putim tupela ERT tim long dispela resis.

Nesanel ER salens bai kamap long Sarere, Ogas 22 we bai lukim ol ER tim na ol gest i go raun lukim DWU Kalsa De. Salens bai pinis long Tunde wantaim ol sere- moni long Madang Risot Hotel.

Mista Round i tok ol resis bai kamap long 7-pela eria insait long tripela de bilong kompetisen. Ol dispela resis em long tiri, kilim dai paia, helpim long rop, painim man i lus, na helpim man o meri lbungim birua.

Em i tok amamas na tenkyu

i go long ol sponsa olsem Falck, Scott Safety, Fire Rescue Safety Australia, IPI, Drager, Chubb Fire na Security, Protector Alsafe, Dunlop PNG, Red Earth, New Castle Rescue, Icom PNG na PWR Australia.

Em i tok dispela ER salens bai i no inap kamap sapos dispela ol gutpela sponsa i no stap.

Dispela ER resis i kama- pim gutpela pasin bilong wokbung na save long wan- pela arapela na strongim wokbung insait long indastri long eria long sefti na helt.

Namba wan ER salens i bin kamap long Lae long 2011.

James G. Kila i raitim

OL RUREL famili long ples i mas wokbung wantaim long groim rais sapos ol gat eria long planim na lukautim.

Dispela em strongpela salens i kam long William Wangeng, wanpela model rais fama bilong Bogadjim eria long Astrolabe Be, Raikos distrik long Madang provins.

Wangeng em wanpela strongpela hatwok man long groim rais we Madang provinsal Dipatmen ov Egrikalsa na Laipstok (DAL) i luksave long em na i save kisim em long ranim ol trening long helpim ol rura fama long groim rais.

Wangeng i wokim dispela toktok long strongim toktok bilong Fud Krops edvaisa long Madang provinsal (PDAL), Mary Lilih olsem ol meri na mama long Madang provins olsem ol mas groim rais long gaden bilong ol na sevim mani.

Misis Lilih i tok olsem planti famili long rurel eria long PNG nau i wok long salim ol gaden kaikai na buai na ol arapela samting long kisim mani long baim rais tasol. Dispela em i no gut- pela taim yu gat graun i stap

long groim rais bilong yumi yet long kaikai.

Em i bin mekim dispela ol toktok long wanpela awenes program long Basamuk long Raikos distrik long groim rais we i go wantaim lukluk bilong Gavman long Visin 2050 long fud sekyuriti long kantri.

Misis Lilih i no amamas olsem planti ol famili long rurel eria i pas pinis wantaim pasin bilong baim ovasis rais long stua, taim ol yet i ken groim rais long gaden na kamapim gutpela kwaliti na famili i ken kaikai na sevim mani long baim ol arapela gutpela samting.

Misis Lilih i tok olsem PNG long olgeta yia i save bringim ovasis rais i kam em mani mak olsem K600 milien.

"Sapos yumi yet i groim rais bilong yumi, bai yumi ken stopim dispela pasin bilon baim rais bilong stua na bai yumi sevim mani na baim ol arapela samting long helpim sindaun na laipstail bilong yumi long ples na hauslain," Misis Lilih i tok.

Wangeng i tok tu olsem ol rurel pipel i save lusim planti mani taim ol i salim gaden kaikai na kumu na buai na ol arapela samting long baim rais beg tasol.

Insait long wanpela awenes long Basamuk, ol mama i tokaut olsem ol i save lusim samting olsem K150 long wan wan wik long baim rais bilong famili i kaikai.

Long taim bilong kwesten na ansa, ol lokal mama i tokaut olsem ol i save kisim bot long Basamuk na go long Madang long K50, na ol i save baim wanpela 20 kilo- gram rais beg em K60, na baim K5 olsem freit kos. Long taun ol i save yusim K20 long baim kaikai long strongim bel na ol arapela mani ol i yusim tu. Na bihain ol i save baim bot long bek long Basamuk. Dispela em bikipela ekspens stret.

"Long go long taun long baim rais beg tasol i lukim yupela i lusim moa long K180, na dispela em mani yupela i ken sevim sapos yu- pela i groim rais long wan wan gaden bilong yupela long ples," Misis Lilih i tok.

Em i givim bikipela salens long ol mama na ol meri long ples olsem ol i gat graun na risos i stap, na tu man bilong ol i ken sanap baksait long ol long groim rais long ples na ol i no ken baim ol ovasis rais long stua na lusim

OTML tok save long pasim operesen

OK TEDI Maining Limited wokman na meri i kisim tok save long Ogas 12 olsem kampani bai statim wok sas- pensen bilong operesen bi- long ol bikos long no gat ren na bikipela Flai Riva wara i drai.

Ol wokman na wokmeri bi- long Ok Tedi wantaim ol lokal bisnis na kontrakta na Ne- senel na ol Provinsal gavman na ol ejensi bilong gavman i kisim tok save pinis

long dispela. Long ol mun i go pinis dispela toktok long kampani bai pasim wok i wok long stap tasol nau em i kamap tru.

Klostu olgeta wokman na meri bai lusim wok na ol bai kisim sampela alawens mani long helpim ol wantaim ol nid bilong ol. Ol bai salim ol i go bek long ol ples bilong ol hariap tasol. Planti handet wokman na meri bai stap yet long main sait long lukautim

na long wokim mentenens bi- long ol samting bilong wok na long givim ol bikipela sevis.

Taim wara i go daun tumas, ol sip no inap long kam insait na go ausait long ol bris bilong main long bringim ol kaikai piul na ol narapela samting.

Mausman bilong kampani i no save hamas mun bai dispela pasim wok i stap tasol ol bai was yet long lukim na bihain toksave long taim bilong statim wok gen.

Groim moa rais long ples long helpim famili - Wangeng



William Wangeng (sanap namba tri long lephan) wantaim meri bilong em Luddy (fran) i soim lokal rais ol i grisim na kukim wantaim pis bilong solwara.

bikipela mani.

Misis Lilih i tokaut olsem Fud na Egrikalsa Ogenais- esin (FAO), we em bikipela bodi bilong Yunaitet Nesens (UN) long wol i putim PNG long namba 77 ples olsem

wanpela pua kantri (kantri nogat kaikai) bikos PNG i save kisim rais i kam long ovasis oltaim.

"Kantri bilong yumi em no kantri bilong hangre. Yumi gat planti ol arapela kaikai i

stap, tasol FAO i yusim rais long putim mak long yumi.

"Olsem na sapos yumi groim rais bilong yumi yet na kaikai, yumi ken abrusim dis- pela mak nogut," Misis Lilih i tok.

Ol yangpela man bilong Bogadjim i bringim rais na redim long milim long Madang. Foto: James G. Kila





Ramu NiCo promotim kakao wok olsem sastenabol developmen

OL MINERAL o ston i gat veliu we i stap aninit long graun bai pinis bikos ol i kolim ol dispela samting non-riniuabel risoses.

Tasol wok bilong agrikalsa bai stap yet na helpim ol pipel bilong PNG long bihain taim. Ol pikinini na tumbuna long PNG bai sanap strong long sapot i kam long agrikalsa long bihain taim.

Dispela em wanpela tingting namba wan divelopa bilong nikel-kobalt projek long PNG, Ramu NiCo Menesmen (MCC) i sanap baksait long en long helpim ol pipel bilong projek eria em i wok long en long Madang provins.

Kam bilong Ramu NiCo (MCC) em namba wan long en em long divelopim nikel projek na salim na kisim mani.

Tasol Kampani i lukluk-moa tu long narapela rot long helpim ol komyuniti insait long Projek eria bilong en stat long Kurumbukari na Inlen Paiplain (Maigari) long Usino-Bundi distrik na Kostal Paiplain na Basamuk long Raikos distrik long Madang provins..

Ramu NiCo Komyuniti Afes agrikalsa supavaisa, Allan Wahwah i tok olsem Gavman bilong PNG i kamapim pinis visin o lukluk i go pas bilong en long kamapim hepi, helti na welti sosaiti long yia 2050. Olsem na agrikalsa em wanpela bikpela eria we bai givim strong long ol rurel pipel long PNG long kamapim wok long bungim dispela wok-mak o visin bilong Gavman bilong PNG. Agrikalsa seksen bilong Ramu NiCo CA Dipatmen i save wok strong long karimaut ol agrikalsa program taim maining wok i stap yet long helpim ol pipel long rurel eria long sanap strong na holim graun na stretim sindaun na laipstail blong ol.

Long las wik ol pipel bilong Bom na Lalok insait

long Astrolabe Be lokal level gavman eria long Raikos distrik, Madang provins i soim gutpela pasin bilong wok-bung long kirapim foapela kakao neseneri

Dispela kakao neseri em Ramu NiCo (MCC) aninit long Komyuniti Afes Agrikalsa seksen i kamapim long helpim ol manmeri na ol famas long ples Lalok na Bom bihain long wara i bagarapim gaden kaikai na ol kes-krop bilong ol sampela taim i go pinis.

Ramu NiCo (MCC) i luk-save long nid bilong komyuniti na Komyuniti Afes dipatmen bilong en i kamapim wanpela wok tim, we i lukim Projek supavaisa em Aldam Bande i go pas long en wantaim ol fil ekstensen opisa i wok wantaim em olsem Daniel Abuta, Seth Win, Samuel Masawa, Kiliai Sapom na Munia Lulug na tu gutpela komyuniti sapot bilong ol gutpela pipel long ples Lalok na Bom.

Las wik, ol lain bilong Agrikalsa seksen bilong Ramu NiCo i bringim ol tuls na samting bilong wok i go long ples Lalok na wokim kemp long Lalok namba 4. Neks de long Tunde wok i stat long moning taim stret we i lukim ol man bilong ples i wok bung na bringim ol samting bilong wok na ol tuls long Lalok namba 4 ples.

Ol i wok sampela taim na ol tim bilong Ramu NiCo i go kamap na stap long putim mak na redim ol ples bilong sanapim ol neseri.

Wankain stori tu i kamap long ples Raiga, em wanpela hap brens o liklik ples insait long Lalok yet we i stap hapsait long bikpela riva. Ol lain man long hap tu i smat tru long wok na sapotim ol yet na bringim ol diwai na rop na tu mambu i go long sanapim neseri.

Ol man long ples i amamas long wok bikos ol i tok kakao bai helpim ol gut bihain, na ol i save olsem bihain long wok bilong maining i pinis, ol pipel na tu ol pikinini bilong ollong bihain taim bai go bek gen long agrikalsa. Olsem na nau em taim long strongim wok bilong agrikalsa bikos em bun tru bilong PNG long bipo yet i kam.

Mista Wahwah i tokaut olsem dispela kakao neseri program bai ron insait long tupela yia na bai kamapim 40,000 sidlings kakao we i ken abrusim sik blong kakao em kakao pod bora (CPB).

Aninit long dispela program tupela neseri bai sanap long Lalok, na ol bai stap long namel o sentral ples, na dispela em long Lalok namba 4 na long Raiga.

Tupela arapela kakao neseri bai sanap long ples Bom.

Mista Wahwah i tokaut tu olsem ol famas long ples bai kisim ol skul na tu kisim ol helpim long ol saveman long wok bilong kakao. Sampela long ol dispela lain saveman e mol lain Ramu NiCo bai kisim i kam long PNG Kakao Kokonas Institiut (CCI) we nau em Agrikalsa Dipatmen i pinisim wok bilong ol.

Em i tokaut tu olsem ol lain fama long ples long ol yia i kam bihain bai kisim gutpela helpim na sapot i kam long kakao neseri na dispela bai bringim mani long ol liklik man long ples.

Wanpela mausman long Lalok namba 4, Rokus Lako i tok em i amamas long dispela nupela neseri wok i kamap bikos ol nupela klon kakao bai stap long dispela neseri na em bai helpim ol famas long ples.

Dispela wok bilong kakao neseri i promotim tu het-tok bilong Ramu NiCo em **'Wanpela Ramu NiCo, Wanpela Komyuniti'**



Bom komyuniti amamas long wok.



Raiga komyuniti amamas long wok.



Sagar kakao neseri klostu long Bogadjim.



Ramu NiCo Management (MCC) Ltd,
the manager of Ramu NiCo Project is proud to host the 5th
NATIONAL MINING EMERGENCY RESPONSE CHALLENGE
in Madang

Date: August 22-25, 2015
Venue: DWU & PNG Maritime College





Tigers i daunim Raiders

WESTS Tigers i bin kamap ol bikman long Mande nait long Kenbera pilai graun taim ol i daunim ol Canberra Raiders.

Raiders i tingting long winim 4-pela gem long 5-pela gem i stap yet, tasol Tigers i kilim paia bilong ol we skoa i sanap olsem 20-18.

Pulbek bilong Tigers, James Tedesco, i go pas na i helpim hapbek Luke Brooks, husat i

setim bal bilong Sauaso Sue na i bin putim namba wan trai bilong ol long 14 minit.

Ol Raiders i sanap strong long pait bek, tasol ol bin i lusim sans bilong ol taim ol i kamapim planti asua.

Prop bilong Tigers, Boyd, husat i gat 122kg i yusim strong bilong em na i brukim banis bilong ol Raiders long 27 minit na putim wanpela moa trai.

Dispela trai i bin skruim skoa bilong ol i go antap long 12 na Raiders i stap long 4 point long klostu long hap taim.

Brooks i pasim win bilong ol Tigers wantaim wanpela moa trai long 70 minit.

Raiders bai pilai wantaim Manly long asples long Sande apinun taim Tigers bai pilai long asples bilong ol long Campbelltown long Sarere wantaim Newcastle Knights.



Burgess bai pilai long Ingran Tes

OL i bin makim bipo namba wan pilaia bilong Sydney Rabbitohs lig, Sam Burgess, long em bai pilai long Ingran Tes.

Em bai egensim Frans long Ragbi Wol Kap (RWC) we pilai bai kamap long Twickenham long Sarere.

Burgess i kam kamap long dispela mak olsem em bai pilai long RWC na em i tingt-



ing we pastaim em i save i gat long pilai long en.

Em bai pilai insait senta long Tes pilai bilong RWC.


Kosa bilong Ingran, Stuart Lancaster, i tok, "Trening bilong Burgess i givim sans long em long em bai pilai long Tes level."

"Mipela bai lukluk gut long Sam long em bai putim kala

bilong em long trening i go insait long Tes pilai, bikos trening bilong em i namba wan tru."

Pilai bai kamap long Sarere em bai namba wan pilai bilong 3-pela Wol Kap womap bilong Ingran we ol bai pilai long Paris bihain long Siks Nesen Sempion bai kamap long Septemba 5.

Mason na Matulino i kisim sas



WARRIORS pilaia, Ben Matulino, na pilaia bilong Manly, Willie Mason, i bin kisim sas aninit long lo bilong NRL long nupela rul bilong solda sas.

Toktok bilong Mets Riviu Komiti (MRC) i sanap olsem, "Gavaning bodi i tok orait long ol solda sas i no strong tumas aninit long nupela lo tasol ol i tambuim ol stronpela solda sas."

Long dispela as, Matulino bai no inap long pilai long

5-pela wik bikos em i bin givim wanpela stronpela solda sas long Gareth Widop, husat i pilaia bilong St George Illawarra.

Mason i bin givim solda sas long wanpela pilaia bilong Sydney, Thomas Burgess, na em bai no inap long pilai 3-pela gem bikos em i no stronpela tumas.

Namba wan pilaia bilong Brisbane, Justin Hodges, husat bai ritaita long pinis bi-

long 2015 NRL kompitisen bai no inap long pilai long pinis bilong dispela wik bikos em i bin mekim wanpela no gut takol long Brett Morris bilong Canterbury.

Hodges bai no inap long misim dispela gem, sapos em i pait gut na winim dispela sas.

Glenn Stewart bilong Rabbitohs bai malolo long wanpela wik long em i bin mekim hai takol long senta bilong Sea Eagles, Steven Matai.



Roosters bai stap yet long NRL maina primiasip

SYDNEY Rooster i daunim Newcastle Knights 38-22 long Hanta pilai graun na ol bai stap yet long maina primiasip.

Roosters i go pas wantaim 32 poin bihain long ol Knight bai skruim skoa bilong ol i kam antap long 22 poin.

Brisbane na North Queensland i stap pas long lata tasol

tupela wantaim i lus long las wik Fraide na Sarere. Dispela i skruim ples bilong ol Rooster i kam antap olgeta long top tu wantaim dispela naispela win bilong ol.

Tupela winga bilong Rooster i putim wan wan trai insait long 13 minit na bihain, pulbek, Roger Tuivasa-Sheck, i putim tupela trai gen long

namba wan hap bilong pilai.

Long namba wan minit bihain long malolo, skoa i bin i go antap long 32 na ol Knights i no kisim wanpela poin yet.

Bihain ol Knights i mekim ran bilong ol na skruim skoa i kam antap long 22 taim Rooster i passim gem wantaim 38 poin.



Belmonte i go pas long ten pin bowling

SPORTING sempion bilong Australia, Jason Belmonte, nau em i namba wan boula insait long wol na em i go pas long ten pin bowling long 2020 Olimpik.

Belmonte i bin go long Japan long makim maus bilong Australia taim bid bilong bowling i bin kamap long Tokyo gems.

I gat 8-pela spot ol i makim

pinis we ol bai pilai long 2020 Olimpik we i winim fainel bid long Tokyo long las wiken.

Tupela yanpela boula tu i stap long asples bilong Belmonte.

"Mi gro na kam antap olsem wanpela boula insait long taun na komyuniti bilong mi, tasol nau mi lukim planti pikinini i tromoi bal i kam olsem long mi na mi

save olsem planti bai kamap boula klostu taim na em i bikpela samting tumas," Belmonte i tok.

"Mi gat bikpela amamas long mi wanpela pilaia tasol bai go long nem bilong kantri na pilai long wol spot."

Insait long 30 spot ol i makim, 8-pela tasol bai pilai na wanpela em i bowling we ol i makim long Tokyo.



Barbara Vali- Skelton i laik senisim namba 3 senis bilong riley resis.

Pini i lukluk long 2016 Olimpik Gems

TOP swima bilong Papua Niugini (PNG), Ryan Pini, bai no inap long lusim gem bilong em na nau em i lukluk long 2016 Olimpik Gem bai kamap long Rio.

Em i mekim gut long 50m Bekstrok resis bilong ol man i bin kamap long Kazan we em i go bungim mak bilong em insait long 26.11 seken.

Pini i soim gutpela mak bikos long Pasifik Gems long kantri bilong em yet long PNG, em i bungim mak insait long 26.14 seken long wankain resis.

Long swim bilong em long Kazan, em i bin kamap nam-ba 35 ples insait long wol, na long semi-fainal pilai, em i bungim mak insait long 0.82 seken.

“Mi no bin kisim planti bagarap long taim bilong resis na dispela i soim olsem mi bin wokim gut na mi bai mekim yet long bihain taim,” Pini i tok.

Pini i tok salens i kamap insait long wol em namba wan tru na em i bikpela swimming resis.

Em i tok moa olsem “I gat bikpela spes i stap na olsem liklik kantri, mipela i gat ol moa strong swima na mipela i lukluk long Komonwelt Gem bai kamap long Australia long 2018.”

Barbara Vali-Skelton i salens long 50m fristail resis bilong ol meri.

Em i bin resis long wankain resis pastaim long 2014 Komonwelt Gems long Glasgow



Ryan Pini i statim riley bilong ol.

na i setim taim olsem 28.62 sekens.

Tasol long de namba 7, em i bungim mak wantaim 28.78 sekens na i abrus long winim pastaim rekot.

“Mi no mekim gut long taim na mi no pilim orait bikos mi no swim kwik, tasol sisen em i gutpela tru,” Vali-Skelton i tok.

Ryan Pini, Tegan McCarthy, Barbara Vali-Skelton na Sam Segheres i kamapim nem bilong kantri gut tru.

Ryan i statim resis na i pin-

isim namba wan 100m insait long 50.86 seken na PNG i stap long namba 3 ples.

Tegan i resis bihain long Pini na i pinisim mak insait long 1 minit na 06.06 seken na bihain long Tegan, Barbara i pinisim mak insait long 1 minit na 04.02 seken.

Sam i pinisim las resis bilong 100m insait long 50.86 seken.

Tasol long las senis, Barbara i no kamap long mak yet na Sam i senisim resis kwik-taim na ol i diskwalifaim ol.

Hunters i redi long pait wantaim Seagulls

i cam long bec pes

Ol pilaia bilong SP Hunters em;	12 Kato Otti
	13 Adam Korave

1 Stargroth Amean	Ol pilaia bai stap sambai bilong senis em;
2 Bland Abavu	
3 Noel Zeming	
4 Edward Goma	
5 Adex Wera	14 Lawrence Tu'u
6 Israel Eliab	15 Atte Bina
7 Ase Boas	16 Willie Minoga
8 Henry Noki	17 Enoch Maki
9 Wartovo Pura	18 Thompson Tete
10 Esau Siune	19 Brandy Peter
11 Timothy Lomai	



Papua Niugini namba wan swima, Sam Seghers, i resis strong long las raun bilong riley. Sam i pinisim 100m insait long 50.9 seken. Foapela pilaia husat i go resis long Kaza, Rasia, i ken stap insait long wanpela posisen long wol rekot tasol Sam i hariap long swim taim Barbara i no pinisim mak yet na ol i fofitim PNG long riley.

Digicel Plei na TV Wan RWC

DIGICEL Plei na TV wan bai soim 2015 Ragbi Wol Kap (RWC) pilai bai kamap long 18 Septemba na bai pinis long Novemba 1.

Em i wanpela namba wan pilai bai kamap long Ingran we planti lain bai lukim, long wanem, em i wanpela top 5 spot iven bai kamap.

CEO bilong Digicel, Maurice McCarthy, i tok, “Mipela i amamas long bringim RWC pilai i kam klostu long haus doa long pipel bilong PNG i ken lukim.”

“I no gat wanpela birua pasin bai kamap namel long taim bilong pilai we ol bai amamas na lukim dispela pilal long haus bilong ol long

TV Wan,” Mc Carthy i tok.

Dispela em i namba wan taim we ol pipel bilong PNG bai lukim RWC pilaia long HD kwaliti.

Ol lain bai lukim TV Wan bai no inap long misim wanpela pilai ol bai pilai long 11-pela siti insait long Ingran na wales.

Ol bai statim namba wan kavarej long opening pilai namel long Ingran na Fiji long 18 Septemba.

“Mipela bai soim olgeta pilai we olgeta pipel i ken lukim,” McCarthy i tok.

Long lukim dispela 200 awa bilong RWC pilai, olgeta lain i laik lukim pilai i mas i gat Digicel Plei Bokis.

PNG U19 Garamuts long ICC U19 Kriket Wol Kap Kwalifaia



Kepson: PNG U19 Garamuts tim i sanap long kisim poto pastaim long ol i go long ICC EAP U19 Trophy long Nu Silan long stat bilong dispela yia.

Mapa i amamas long ol Sauten Son trail pilai

Philemon Tame i raitim

TIM Menesa bilong Pot Mosbi Sabebe tim tu, Noel Mapa, i amamas long pilai bilong ol long taim bilong opim Sauten Son trail pilai i bin kamap long Mande long Kone Taigas pilai graun.

Sabebe tim tu i no putim wanpela spes long ol Kerema i ken brukim banis bilong ol long kisim skoa.

Banis bilong Kerema i slek

tumas na ol Sabebe 2 i putim trai olsem ol i save kapsaitim wara we skoa i sanap olsem 22-0.

Mapa i tok, “Dispela win bai givim moa strong long mipela long ol pilai i stap yet na mi laikim planti pilaia bilong tim Sabebe 2 i ken go insait long seleksen bilong Sauten Son pilai bai kamap long klostu taim.”

Long wankain taim, de wan risal i sanap olsem Sen-

INTENESENEL Kriket Asosiesen (ICC) i tokaut olsem ICC U19 Kriket Wol Kwalifaia bai kamap long 14 i go long 23 Oktoba long Kuala Lumpur, long Malaysia.

PNG U19 Garamuts bai stap insait long dispela tonamen long gat sans long kwalifai long ICC U19 Kriket Wol Kap.

I gat 5-pela tim bai resis insait long Anda 19 Kwalifaia, em Ireland, Nepal, Papua

Niugini, Uganda na USA.

PNG Anda 19 Garamuts Kosa John Ovia i tok ol tim memba bilong em i go long kisim sampela strongpela trening bihain long ol i bin kam bek long ICC EAP U19 Tonamen long Nu Silan.

PNG Anda 19 Garamuts i bin winim pinis dispela kain resis long seven (7) ICC Anda 19 Kriket Wol Kap - 1998, 2002, 2004, 2008, 2010, 2012 na 2014.

tral Primia Lig 8 na Hiri 6.

PRL Yelo na Pom Sabebe 1 i bin statim dispela trail-pilai na tupela wantaim i pilai wankain gem we no gat wanpela i win na skoa bilong tupela sait i sanap olsem 8 poin.

Kisere Boars i daunim Rigo Magani 12-6 taim Kelone i win 22-12 long pilai egensim Taruba.

Motu Koita i bin pinisim olgeta strong bilong em long

namba wan pilai tasol PRL Grin i bin strongim tumas banis bilong ol na daunim ol 12-4.

“Ol pilaia bilong tim husat i win tasol bai no inap long go long seleksen, nogat,” Mausman i tok.

“Ol man husat i go pas long hap bilong seleksen bai lukluk gut long ol kala bilong wan wan pilaia long olgeta tim long trail pilai na makim ol long ol bai pilai long Sauten Son.”

Kiunga bai no inap lukautim Besta Kap

OL i makim Kiunga, Western Provins, long makim Sauten Rijon na lukautim Besta Kap soka salens bai kamap long Ogas 20-24 tasol Kiunga bai no inap hostim dispela pilai. Ol i senisim hap bilong pilai bikos wara level bilong Flai Riva i go daun tumas na ol tim bai painim taim long i go i kam long hap bilong pilai. Besta Kap soka salens nau em Koupa Soka Asosiesen na Pot Mosbi Soka Asosiesen bai lukautim. Wapela mausman long Papua Niugini Futbol Asosiesen i tok orait long senisim hap bilong pilai na i tok, "Wara level i go daun em i wapela

bikpela taim nogut we ol pipel bilong Not Flai Distrik i bungim." Ol tim bai pilai long Besta Kap em NCD Pablik Sevis Soka Asosiesen, Pot Mosbi Soka Asosiesen (NCD), Alotau (Milen Bei), Higaturu (Noten) na Nawone (Westen). Ol i no tok orait yet long Galp tim tasol ol bai salim wapela tim i kam bikos ol i senisim hap bilong pilai. Presiden bilong Pot Mosbi Soka Asosiesen (PMSA), John Wesley Gonjuan, i tok, "Las yia mipela i no gat wapela pilai graun bilong soka tasol nau ol i bin wokim ol pilai graun bilong Pasifik

Gem na stretim Bisini soka pilai graun." "PMSA i laik yusim Bisini pilai graun tasol ol PNG Spot Faundesen i holim yet long pilai graun i ken kisim kala bilong em bihain long gems," Gonjuan i tok. "Mipela bai stretim dispela toktok bipo long Besta Kap soka salens i stat long neks wik." Ol narapela liklik asosiesen husat i tingting long pilai wantaim long Kiunga bai no inap pilai long Besta Kap long Mosbi, taim hap bilong pilai i senis bikos bai bikpela mani tumas long ol i kam pilai long Mosbi.

Eagles i go insait long kwata fainal



MIPELA KAM: Mt Hagen Eagles i mekim top 8 bilong Digicel Kap taim ol winim Pot Mosbi Stop N Shop Vipers long wiken 7-6. Poto Nicky Bernard.

Philemon Tame i raitim

Mt HAGEN Eagles i daunim Pot Mosbi Stop na Shop Vipers long asples graun bilong em long Mari Bareks pilai graun long las wik Sande. Dispela win i strongim ol Eagles i go insait long kwata fainal bilong Digicel Kap long 2015. Vipers i save go long fainal long ol pastaim pilai bilong em, tasol nau ol Hagen i dau-

nim em wantaim wapela poin tasol we skoa i sanap olsem 7-6. Pilai raun namba 16 em i stat gut wantaim ol Vipers we i putim namba wan trai pas tasol, birua bilong ol Hagen i strong tumas long kamap wina. Olgeta 6-pela Hailans tim bai go insait long kwata fainal em Hela Wigmen husat i daunim Rabaul Gurias 16-6, Simbu Lions i daunim ol Goroka

Lahanis 18-17 na ol Hagen. Ol Goroka tu bai go long kwata fainal na em bai salensim ol Hagen, na ol Mendi bai kamap birua wantaim ol Jiwaka long taim bilong fainal. Hela Wigmen bai pilai wantaim ol Lions long Simbu long taim bilong fainal. Ol mangi long Kerema na Mosbi bai no inap long go insait long kwata fainal taim ol Tigers long Lae bai kaikaim ol man long ailan long Rabaul.

Kaybing lusim sia

OL i rausim kosa bilong Simbu Lions, Hans Kaybing, na dispela i bagarapim ol wok redi bilong ol Lions long go long fainel pilai long Digicel Kap salens. Kaybing i namba tu kosa husat i bihainim namba wan kosa, Steven Saki, i bin stat kosa bilong ol long namba wan de long taim 2015 gem i stat. Nupela kosa bilong ol, Sako More, bai karim ol Simbu i go long fainel, tasol 4-pela namba wan pilai bilong ol Lion i bin

kisim bagarap na asua i kamap pinis long redim fainel kwiktaim. "Ol pilaiia husat i kisim bagarap, James Mijin, Rex David, Steven Gari na Sam Paul, i mekim na klostu mipela i lus long las wik gem wantaim ol Lahanis tasol laki tru mipela i win long las minit wantaim wapela poin," Gerard Philip, husat i dai hat bilong Lions, i tok. Em i tok moa olsem, "Lions i win wantaim wapela poin 18-17 bikos ol pilaiia i save


daunim ol yet na i save gat disiplin pasin long ol." Ol sapota bilong Lions i stap long Simbu, asples bilong ol, taim gem i kamap na ol i kamap hap bilong pilai na i tromoi ston long ol pilaiia bilong ol Lahanis. Wapela sapota bilong ol Simbu, husat i no givim nem bilong em, i no laikim ol sapota i kamapim birua pasin wantaim ol pilaiia. Em i tok, dispela kain pasin mas i stop long taim bilong ol fainel.

PRL i redi long pilai long Sauten Son

Philemon Tame i raitim
POT Mosbi Ragbi Lig (PRL) i makim ol pilaiia bilong pilai long Sauten Son trail pinis. Olgeta pilaiia husat bai pilai long Sauten Son bai no inap pilai long dispela pinis bilong wik aninit long wan wan tim bilong ol. Lig bod operesen na edministresen menesa, Meke Maino, i tok aut long Kone Taigas pilaiia graun long las

wik Sande olsem tupela senia tim bilong man, meri, anda 19 na anda 16 bai malolo long dispela wiken bikos, ol bai stap wantaim strong long go pilai long Sauten Son. Maino i tok, "PRL i laikim ol pilaiia husat i gat moa strong long olgeta divisen we ol bai banisim gut sait bilong ol long birua tim bai putim trai." "Ol i mekim seleksen aninit long namba wan wok na pilai bilong ol tim opisal na pilaiia

long ol bai makim PRL na pilai long rijenal trael." "Risalt bilong gem tasol bai soim olsem seleksen mipela i mekim em long rait o rong rot." Em i tok moa olsem, "I gat planti gutpela pilaiia i stap tasol no gat spes na ol i no makim ol." "Ol i ken pilai strong yet, long wanem, i gat planti sans i stap long ol bai pilai," Maino i tok.



Pilaiia bilong Pot Mosbi Stop N Shop Vipers i redi long pasim bal long wan pilaiia bilong em long wiken pilai wantaim ol Mt Hagen Eagles.

Stop N Shop Pot Mosbi Vipers i aut nau long fainal bilong Digicel Kap. Ol i lus long Mt Hagen Eagles long las wiken long las raun bilong Digicel Kap resis. Stop N Shop Vipers bai namba wan taim em i no stap long fainal bilong Digicel Kap. Vipers na Gulf Isapea em tupela tim save stap long Mosbi na tupela wantaim i no stap long fainal. Ol fainal pilai bilong Digicel Kap bai kamap long Lae na Hailens rijon long dispela wiken. Lae Snax Tigers i go pas yet long poin lata na i luk olsem ol bai kisim maina primias gen long dispela yia. Long las yia ol bin kisim maina primias, tasol ol i lus long semi fainal.

Poto na Stori: Nicky Bernard.

Port Moresby to LOSUIA

Buy one Y class POM to Losuia and pay for the next 3 at **15% DISCOUNT!**

You also get a **27% discount** on rooms at Lokuia Lodge which includes meals.

www.facebook.com/linkpng

Where would you rather be?

Offer ends July 31st, 2015

***TERMS & CONDITIONS APPLY**


Book online at www.airniugini.com.pg

Call Toll Free: **180 5465** or email: sales.linkpng@airniugini.com.pg / tours@airniugini.com.pg



- 1 **LEK PAWA:** ilaia bilong Taurama Sons i trim pawa long lek bilong em long AFL resis long Mosbi.
- 2 **RESIS LONG BAL:** Pilaia bilong Taurama Sons na pilaia bilong Bomana Cats i resis long kisim bal long AFLA gret pilai long Mosbi. Taurama Sons i winim pilai.
- 3 **YU KAM:** Bikpela fowet bilong Mt Hagen Eagles i kam pas long ol strongpela Pot Mosbi Vipers long Digicel Kap pilai long Mosbi. Eagles i win 7-6.
- 4 **STRONGPELA BANIS:** Winga bilong Vipers i no inap tru long brukim banis bilong Eagles taim olgeta i kam bungim em na takolim em.
- 5 **HAGAMAPIM SU:** Ol Pot Mosbi Vipers pilai i rausim su bilong ol long taim pilai i pinis long Murray Bareks pilai graun wantaim ol Hagen Eagles. Vipers i no go insait long fainal bilong Digicel Kap bilong dispela yia 2015.

Lukim piksa bilong Kepten bilong SP PNG Hunters Israel Eliab i ran long 40-mita na putim trai long pilai agensim ol East Tigers long Kokopo. Eliab i save wokim planti long ol dispela kain trai.



IMPROVED TASTE! Niupela teist wantaim planti mit na oil. Teistim na bai yu laikim moa yet.

DIANA

Tuna



Emi tuna
bilong PNG



Manufactured by



RD Tuna Canners Ltd.


Moa mit na
oil insait



TUNA IN OIL

Hunters i redi long pait wantaim Seagulls

HIT MAN: Brandy Peter, em i wanpela bikpela fowed na hit man bilong SP PNG Hunters. Brandy bai kam olsem senis man na bai sindaun long bens taim Hunters i bungim Wynnum Manly Seagulls long dispela Sande long Sir John Guise stedium long Mosbi. *Poto Nicky Bernard.*



INTRAS Supa Kap pilai namel long ol SP Hunters na Wynnum Manly Seagulls long Sande bai makim namba tu taim we ol bai pilai long Sir John Guise stedium long Pot Mosbi.

Namba wan ragbi gem i bin kamap long dispela pilai graun taim ol Hunters wantaim narapela tim i pilai bipo long 2015 Pasifik Gems i kamap.

Dispela em i namba 23 raun na Hunters i redi pinis long paitim ol Seagulls long taim bilong pait bikos ol Seagulls i bin daunim ol 36-18 long raun namba 6 long BMD Kougari pilai graun long Brisben, Australia.

Las wik, win bilong Hunters we ol i bin daunim ol Ipswich Jets tu i givim moa strong long ol bai bekim win bilong ol Seagulls long raun namba 6.

Tasol, Manly i ting olsem em i gat moa strong na bai no inap long givim sans long ol Hunters bikos long las wik ol i daunim ol Burleigh Bears 46-24 na tu, ol i bin daunim ol Hunters long raun namba 6.

Bai ol i salim ol tiket bilong dispela gem long ol Stop and Shop stoa long Fraide. Ol bai sasim K50 long grensten na K25 long ol arapela hap bilong sindaun. Pilai bai stat long 2:30 apinun.

...lukim moa
long pes 25

50 years
1965 - 2015
BOROKO MOTORS

PMV

DIESEL OIL

PMV OIL BILONG YUMI

BOROKO MOTORS

BOROKO MOTORS

PORT MORESBY	325 5255
LAE	472 1144
MT HAGEN	542 1933
TABUBIL	649 9048
KIMBE	983 5035
MADANG	422 2659
KOKOPO	982 8193
GOROKA	532 3552

Email: info@borokomotors.com.pg
Website: www.borokomotors.com.pg

Kolta rot na pawa bai kamap long Sauten Hailans na Hela

Paul Zuvani I raitim

GAVMAN bai tokaut long wok developmen bai kamap long Sauten Hailans na Hela provins bihain long dispel mun.

Wok olsem putim kolta long rot long Mendi long Sauten Hailans i go long Tari long Hela provins, Fainens Minista na Memba bilong Tari Pori, James Marape i mekim dispel tok long FM 100 Tokbek So long dispel wik.



Fainens Minista na Memba bilong Tari Pori, James Marape

Narapela wok em long bringim pawa long Hides i go long Koro, Komo, Tari, Nipa na Mendi.

Em i tok maski Hela na Sauten Hailans i givim planti sapot long ikonomi bilong kantri long wel na ges projek bilong ol, i no gat wangepela gutpela samting i stap long ples long soim olsem em i gat ol gutpela samting aninit long graun.

Em i tok Praim Minista bai tokaut long olgeta plen bilong dispel ol wok developmen taim em i mekim wokabout bilong em i go

long Hela provins.

Em i tok Hela i sapotim kantri long Pasifik Gems taim em i givim 25 megawat pawa saplai long Pot Mosbi.

Tasol pawa Hela na Sauten Hailans bai kisim bai liklik em long tu (2) megawat tasol.

Na gavman bai putim kamap tok save pepa long ol pawa kampani long ol i aplai long kisim kontrak long kisim pawa long Hides na givim i go long tupela provins.

Gavman bai skelim wok bilong ol ovasis edvaisa

Paul Zuvani I raitim

LONG Desemba 31, 2015 ol ovasis edvaisa bilong gavman bai save sapos ol bai wok yet long kantri nogat.

Gavman bai skelim wok ol i mekim nau na tok save sapos ol bai stap yet o nogat.

Sapos i gat wankain savemanmeri long kantri inap long mekim wok ol i mekim nau bai ol dispela ovasia opisa i mas go.

Praim Minista Peter O'Neill i mekim dispela tok bihain long askim i kamap long wanem as ol opisa bilong narapela kantri kontrak bilong ol i pinis tasol ol i stap yet.

Mista O'Neill i tok gavman i luksave long dipela hevi na olsem em bai sindaun na skelim husat opisa inap long stap na wok yet na husat bai go.

"Yes, mipela bai glasim we mipela i no gat savemanmeri bilong mekim wok ol opisa bilong narapela kantri i mekim bai stap tasol sapos i gat saveman ol bai go," O'Neill i tok.

Selebretim 40 yia indipendens wankain olsem 15 Pasifik Gems - CHARLES ABEL

TAIM kantri wok long lukim ol selebresen i stat long 40 yia Indipendens eniveseri long mun Septemba, Minista bilong Plening, Charles Abel i singaut long ol pipel long stap yet long wankain spasin olsem long taim kantri bin holim 15 Pasifik Gems.

Mista Abel i tok kantri bin lukim bel isi, wanbel na gutpela taim ol Papua Niugini i soim na dispela i mas kamap yet long soim olsem Papua Niugini em i wanpela divelop kantri i save lukautim gut ol samting na pipel.

Minista i tol Gavman i opim pinis StaRS inisetiv wantaim MTDP 2 divelopmen plen bilong bringim Papua Niugini soim ol as tingting bilong responsibel sastenebel divelopmen.

Em i tok Gavman i kamapim wanpela awenes program ol i kolim "PNG Em Yah!" kempein long strongim as tingting bilong StaRS na long toksave bilong kamap wanpela smatpela, i gat save na i gat amamas PNG taim yumi kisim yia 2050.

Dipatmen bilong Plening i bin tokaut long wanpela opisal websait long bringim edukesen na awenes long ol plen bilong Gavman, wantaim MTDP 2 wantaim ol narapela Gavman pepa olsem 2050 plen. Dispela websait ol i kolim PNG EM Mi Yah kempein.

Minista i mekim ol dispela toktok long taim em i opim Human Rait Film Festival long Pot Mosbi. Festival i wok long raun long kantri olsem hap bilong ol selebresen bilong go bungim 40 yia indipendens eniveseri long Septemba 16.

Dipatmen bilong Plening nau i wok long redim wanpela draf pepa bilong 'Plening Ekt' long bungim olgeta Gavman plening proses i go long Nesenel Baset aninit long MTDP 2 plen. Dispela bil bai go long Palamen taim ol memba i go sindaun gen long Novemba.



YUT PROGRAM: OL sampela yut bilong Nesenel Kapitel Distrik i stap insait long yut program bilong NCD long Marimari Luteran Sios graun, Gordons long Pot Mosbi. *Poto: Nicky Bernard*

Naru soim pasin long Aseki

Bustin Anzu i raitim

MASKI ol i bagarapim em na kisim em i go long kot, em i no belhat o kros long dispela.

Em i go bek na stap poromanim ol na lus tingting long dispela long bringim gutpela sevis i go bek.

Na planti husat i go long lukim wanem samting i kamap long Aseki Gavman Stesen i amamas long lukim Morobe Gavana Kasiga Kelly Naru.

Na planti tu lusim ai wara. Long 2012, Kasiga i go long Aseki na ol ples klostu na kempen olsem em i wanpela trupela gavana husat bai skelim kaikai long olgeta manmeri bilong Morobe.

Taim em i winim olpela Gavana, Luther Wenge long 2012 nesenel ileksen, sampela sapota bilong em long Menyamyia i bin pasim tok wantaim em na tok olsem Naru i braibim o givim mani long ol vota long sapotim em wantaim K25,000.

Tasol Nesenel Kot long Lae i rausim dispela kot bilong wanem, petisina wantaim ol lain witnes bi-



Naru i sanap name wantaim ol sios memba bilong Aseki Seket long taim bilong tok sori.

long em i no gat inap evidens o ol trupela ripot long sapotim dispela stori bilong ol.

Las wik Sarere, Kasiga Naru i go bek long dispela veli wantaim ol opisa bilong em long toksave long ol lain Aseki olsem ol i bin votim em o no gat. Em i no wari, tasol sevis bai go yet.

Kasiga i kisim bel isi long dispela na givim K25, 000 kesmani i go long ol lain Aseki na tok olsem

em namba wan wok boi, em lus tingting long ol i bagarapim em long taim bilong kot.

Aseki Seket manmeri i tok sori na prea wantaim long dispela hevi na toksori long em na givim tupela pik, ol gaden kaikai na bilum long em.

Kasiga Naru i bin tokim ol manmeri olsem ol wanpela Kristen kantri na ol i mas lusim rong bi-

long narapela husat i mekim rong long ol.

Em i tok Jisas Kraisi i dai long diwai kruse long pekato bilong ol na ol mas lusim rong bilong husat narapela i mekim. Dispela tu i stap long buk Baibel.

Em i tok Praim Minista na husat i holim kain nem, olsem Robin Hood: "Mi lusim sin bilong ol na lus tingting."

Wantaim dispela, Kasiga Naru i strongim wok bilong 10- pela sios grup, tupela skul na sampela mama grup, aninit long Kristen Sios Patnasip Program (CCPP).

Samting olsem K190,000 em Gavana i givim wantaim 15-pela bek klos long ol wod kaunsil bilong Nanima Kariba LLG long Aseki.

Aseki Luteran Hai Skul tu i kisim luksave long dispela bung wantaim wanpla nupela dyna kar.

Long Sande, Kasiga i bin go long Bulolo Luteran Sios na blesim Jisas Kraisi Luteran Sios wantaim wanpela K10,000 na narapela K10,000 long ol mama grup, aninit long SME helpim.